

Procuraduría para la Defensa de los Derechos Humanos (PDDH)
Estadio Nacional 1½ c. abajo.
Teléfonos: 2266-3257 / 2266-3258 / 2266-8972
2268-2789 PBX: 2266-0597
Apdo. Postal: 369
Página web: www.pddh.gob.ni
Managua, Nicaragua.



PDDH

Prohibida su venta

Lâ 779

**Alsut kumi ra daukan Lâka mairin nani
ra karnika ni saura munanka mapara
bara Numba 641 ra “Saurka Tara
Paniska” baku ulbanka bapanka sât wala
daukanka nani**

act:onaïd

**Wangki
Tangni**

PROCURADURÍA PARA LA DEFENSA DE LOS DERECHOS HUMANOS

“Por la Igualdad, Dignidad Humana y Solidaridad”

**LÂ Numba 779, Siakwa Kati 26 yua, mani 2012 ra
aitani kulkan ba**

**“La Gaceta” Numba 35 ra ulbi sakan, Kuswa Kati
22 yua, mani 2012 ra**

NICARAGUA LÂKA DADAUKRA NANI ASLIKA

Nicaragua Kuntrika Gabamintka Prisidintka ba

Ai uplika nani ra, Nu banhwi bas:

Nahki,

NICARAGUA LÂKA DADAUKRA NANI ASLIKA

DARA WALANKA BRIH KI

I

Mairin nani ra bahki kulki karnika ni saura munanka mapara lâ bapanka nani bâra ba, yamnika nani briaia pliki ba sip alkras sa ai rayaka, ai prika lâka bara ai wîna ra pain kulkanka kaina kahbanka rait aihwa ba dukiara, baha tâka mita nitka tara bâra sa klauna Lâka kum ulbi sakaia tânka tara bri ba bahmuna, naha trabilka na aiska pali laki kaikbia, mairin ra karnika ni saura munanka marikanka nani sât sât bâra ba tânka pliki bara paniska kahbi.

II

Nicaragua Gabamintka ba kuntri wala nani wal triti lâka nani bahmuna sât sât ulbi âu taki sain munan sa, wibia kaka nahmuna baku: "Mairin mapara Kulkanka mayara yabanka Natka nani sut ba danh tikaia Asla Takanka Tara ba", "América Kuntrika nani Asla Takanka Tara ba Mairin mapara Karnika ni Saura Munanka ba yaka takaia apia, paniska yabaia bara danh tikaia dukiara", "Tuktan Raitka nani dukiara Asla Takanka Tara ba", bara "Kuntri nani Asla Takanka Tara ba Upla nani Skahwa mita sip diara daukras Raitka nani ba dukiara", wala nani tilara. Naha daukanka nani mita Gabamint ra taibi munisa lâ sâtka kau pain nani bapaia, baha mita yaka Lâ mawanra alsut ra kulkanka kasak kum yabia dukiara, kulkanka mayara yabanka danh tikaia bara mairin mapara karnika ni saura munanka pali ba yaka kau takaia apia ai marikanka nani sât sât ba tilara.

III

Nicaragua Gabamintka Pulitik Lâka Bapanka Tara bri ba mita upla raitka nani Gabamint bui kulkanka yabi ba ra kulkanka yabisa, upla kumi bani raitka nani ba, rayaka bri kaia raitka ba, upla wîna tara aiska, sinska bara daukanka raitka ba, wîna tara tani ra, yamni munanka, kulkanka, ai prika lâka, trabil âpu kaia bara lâ mawanka saura munanka briras kaia ba; baku sin kulkanka tara yabisa upla nani silak ra banhwi ba bara lâ mihta ra nani ba; ban sakuna, nit sa kaina kahbanka

nani sirpi kabia sin plikaia watawanka lâka mita trabil
bri uplika nani hilpka dukiara.

BAKU BAMNA,

Ai karnika nani bri ba tânka kat,

ULBI SAKAN SA

Naha dukia:

ALSUT KUMI RA DAUKAN MAIRIN NANI RA
KARNIKA NI SAURA MUNANKA MAPARA BARA LÂ
NUMBA 641 RA "SAURKA TARA PANISKA" BAKU
ULBANKA
BAPANKA SÂT WALA DAUKANKA NANI

ULBANKA PUTKA I

LÂKA BAPANKA NANI BARA KULKAIA LÂKA NANI
AISKA SUT TÂNKA RA

Sapta I

Dîa dukiara, ani pliska ra bara pulitikka nani

Baiki Sakanka 1: Dîa dukiara Lâka bapisa

Naha lâka na ai bapanka baku brisa mairin nani ra karnika ni saura munanka ba mapara aiklabaia, mairin nani ai raitka bri banhwi ba kaina kahbaia dukiara bara yaka ai rayaka ba saura munanka âpu pri lâka ra iwi kabia, ai pâwanka bara ai painka tani ra tâ baikanka yabia dukiara alsut kumi bara kulkanka mayara yabanka yabras bapanka nani ba tânka kat; kaina kahbanka aiska yabaia natka nani bapaia karnika ni saura munanka ba kainara ridi kaia, panis yabaia bara danh tikaia dukiara bara karnika ni mairin nani ra saura munanka yabi ba ra hilpka yabaia, upla nani iwanka natka bara wan almukka nani wina daukanka nani bapan ba yaka sin taki, baha mita sika karnika lâka tânka nani ai mihta ra bri ba.

Baiki Sakanka 2. Ani Pliska ra Lâka daukbia ba

Naha Lâka na daukan kabia upla sut mawanra bara utla bîla kat sin, ani uplika bui mairin nani ra karnika ni saura munanka daukbia ba mapara aima kumi baman natka ra, apia kaka kli kli daukbia ba. Naha Lâka na kahbi ai karnika bri kabia ani uplika nahmuna tânka nani tilara kaka: uplika wala wal sim ai tâlia bri ba, wal ai tânka kumi, main kaikanka tilara nani ba, wal bri waitnika/mairka, wal bri kan waitnika/mairka, marit aihwa apia sakuna wal asla iwi ba, marit aihwa apia sakuna wal brisi pat swin ba, wahma/tiara wal kut taki

banhwi ba, wahma/tiara wal kut taki si pat swin ba, wal latwan kaiki ba tânka, wal pain kakaira apia nani, baku sin upla wâl pana pana ai tânka bri ba bahmuna bara baha tâka mita nahmuna saura munanka bri balaia sip ba.

Upla sut mawanra karnika ni saura munanka lâka: Baha sika daukanka o daukras dukia kum kunin natka ra o trabil takaia ba ai dara walras mita taki ba, tawan sirpi ra baha takisa, wark pliska ra bara apis bahmuna ra o ani ani pliska ra, mairin raitka nani mapara daukbia ba ani ani uplika bui o Gabamint mita kra, baku sin tawan lalka nani o gabamint warkka tatakra nani mita.

Upla bîla kat karnika ni saura munanka: Baha sika taki ba pamali bîla kat, apia kaka wal iwi ba tânka sât sât ra, saurka dadaukra ba mairka wal sim watla ra dimi o dimi kan sapa.

**Baiki Sakanka 3. Alsut kumi ra kaina kahbanka
upla sut mawanra dauki pulitikka nani karnika ni
saura munan uplika ba tani ra**

Gabamint ba ani aslika baha kaikaia karnika bri ba bâk, blestu sa:

- a) Mairin nani sut ra kasak pali yabaia, ai raitka nani rait aihwa daukaia sip kabia, baha wapnika mangkaia wisi mangkan warkka nani ra istikira, klin lâka ra bara kasak pali daukbia dukiara.

- b) Mairin nani ra karnika ni saura munanka dauki ba dukiara nikbanka nani buki karna daukaia sturi aisanka, kler munanka bara sinska ra diara yamni nani dingkanka bâk, ai raitka nani, hilpka nani bara upla sut mawanra an utla bîla kat taki dukia kakaira saki, baha ba yaka takaia apia, kulkanka saura yabaia bara danh tikaia dukiara.
- c) Mairin nani mapara karnika ni saura munanka kainara ridi kaia dukiara upla sut mawanra pulitikka nani ba kau pain daukaia, baku sin mairin tâka mita kulkanka mayara yabanka ba danh tikaia; wark daukaia “planka” kum paskaia, alki daukaia bara pura kaikaia mairin nani mapara karnika mi saura munanka ba dukiara kainara ridi kaia, paniska yabaia, hilpka yabaia bara danh âpu daukaia mata.
- d) Gabamint aslika nani ra lalah hilpka nani, wark tâ brabrira nani, sinska tara bri uplika nani bara tâ baikanka nani sât sât yabaia dukiara, bara baku sip kaia mairin nani mapara karnika ni saura munanka ba hilpka aitani kat yabaia, kainara ridi kaia bara danh âpu daukaia mata, baku sin baha pâtka daukbia uplika nani paniska aitani kat yabaia bara upla baku sinska lâka nani aitani yabaia bara baku lika mistikka ba kli daukbia apia.

- e) Piuu kau kan alkanka kau sirpi natka nani ba paskaia bara karna daukaia, baku sin karnika ni saura munanka ra aimakaia ba, Lâ dîa dukiara bapan ba tânka kat, nahmuna warkka nani ra: sturi yabaia warkka nani ra, hilpka yabanka ra, isti pali daukaia natka ra, kaina kahbanka ra, tâ baikanka ra, takaskaika bara aiska kli pain takaia dukiara, baku sin aikuki asla natka kum paskaia bakahnu diara dauki muni yaka wark nani pat bâra banhwi ba kau pain daukaia dukiara, baha lika “municipio”, tasba baiki sakanka tara, klauna tasbaya baiki sakanka bara kuntri aiska tani ra.
- f) Wark tara dadaukra nani, aipaswanka nani bara asla takanka nani ba aikuki asla bara bakahnu wark daukia mata nikbanka daukaia, witinka nani lika upla nani aslika wina mairin nani ra karnika ni saura munanka mapara aiklabi banhwi ba.
- g) Upla bani ra raitka yabanka warkka dauki mairka bara waitnika nani ba yaka piuu bani sins lâka kau lan taki banhbia, witinka nani bui pât tilara uplika nani ra sturi yabi, main kaiki bara kaina kahbi banhwi ba.

- h) Sinska nani smalkanka piua bani yabaia trai munaia bara kau diara wala nani kakaira takbia Mairin bara Tuktan nani Trabilka pura kaiki Warkka tâura banhwi ba uplika nani ra, baku sin Upla dukiara Gabamint tilara wark tara dauki Daknika ba mata.
- i) Isti pali daukanka natka bara daukbia apia dukiara kainara daukanka nani dukiara kaina kahbanka natka nani bapaia bara karna daukaia, baha mita naha Lâka ra kaina kahbanka yaban raitka nani ba yaka rait aihwa takbia, baku sin ani mairka mapara karnika ni saura munanka pâtka tilara ba ra kaina kahbanka yabaia wîna ba kat, wîna tara, warkka tani ra bara ai prapatika bri ba lainka ra.
- j) Telepong lainka kum mana luha bahmuna kwâkaia, baha ba kanik munan kabia pulis nani wal, baku sin Upla dukiara Gabamint tilara wark tara dauki daknika wal, baha mita sturi nani lakbia bara sinska tânka nani yabia trabil nani bâra ba mairin nani ra karnika ni saura munanka ba dukiara bara ya nani bahmuna paniska wahwi banhwi ba mata.

Sapta II

**Kulkaia lâka nani, ani wina taki banhwi ba bara
upla raitka nani**

Baiki Sakanka 4. Lâka rul muni ba kulkaia tânka nani

Naha baiki sakanka ra tâ bri ba bapanka nani ulban na, alki daukan sa upla nani ba lâ mawanra alsut kumi baku yaka kulkanka bribia dukiara, kuntri wala nani bahmuna ulbanka nani daukan ba tânka kat, baha nani ba Nicaragua Gabamintka mita sin sain munan bara kli kulkanka aihwa yaban sa:

- a) Kasakka lâka briaia kulkanka lâka:** Gabamint Warkka Tâ Brabrira Daknika nani ba, lâ dadaukra nani aslika tâura nani bara tawan sirpi tâ uplika nani ba mita mairin nani ra blestu yabaia sa, sât wala kulkanka kumi sin yabras kira, hilpka lâka bara tâ baikanka nani yabi banhwi ba rait aihwa briaia, naha hilpka briaia yabalka prakbia trabilka nani bara bahmuna dukia nani takbia ba sut sait ra laki.
- b) Istikira kulkanka lâka:** Naha lâka ra baha tânka nahki dauki brih waia bapanka mangki ba, mahka pali, istikira bara takaskras wapnika mangkan kaia sa, piua nani mangkan ba bilka ra wapnika mangkanka kum bribia ba kat; baha warkka tâura mairka bara waitnika nani dĩa dukia nani blestu daukaia bri ba daukras sa kaka, ai purara lâ ba kauhisa bara sip sa panis nani bara trabil wala sin witin nani purara kauhaia.

- c) **Aipaswanka kulkanka lâka:** Lâka daukanka ba mahka tâ krikbia taim, baha ba sim yua snata alkaia sa dîa dîa nani aisaia bri uplika nani bui tânka marikanka nani kahbia taim. Baku daukaia sip apia kaka, yua nani aula ba bilka ra taim uya wihka brih waras ban dauki wabia baiki sakanka nani 288 bara 289 ra Lâ Numba 406 bilara ulbanka ba kat, “Nicaragua Kuntrika Gabamintka ra Saurka Tara Paniska lâka Daukanka Ulbanka Bapanka ba”.
- d) **Kuntri bilara dakni wala nani aikuki wark daukaia kulkanka lâka:** Pain watska takaia naha daknika nani na ai warkka tânka kat daukbia: Mairin bara Tuktan nani Trabilka pura kaiki Warkka Tâura ba, Upla dukiara Gabamint tilara Wark Tara dauki Daknika, Upla nani Tâwan Aisasara, Upla Pruan Wîna Tara saun muni tânka kler saki Pliska, Upla nani Lâka dauki Karnika, Mairin nani dukiara pura kaikaia Karnika bri Uplika Kulkanka Tara bri ba, Tuktan nani dukiara pura kaikaia Karnika bri Uplika Kulkanka Tara bri ba, Skul ra Smalkanka Ministerioka, Wan Wîna Tara Yamnika Ministerioka, Pamali, Wahma/Tiara Aihwa apia bara Tuktan nani Ministerioka, Nicaragua bilara Mairin nani Tânka pura kaiki Aipaswanka, Kuntri bilara silak watla ra mangkan uplika nani panis yabaia bara wapnika mangkaia pliska Natka bara tawan sirpi tâ brabrira nani sin warkka nani daukaia nit kabia ba aikuki dauki banhbia, baha lika ani uplika nani ra karnika ni saura munanka dauki ba kaina kahbaia dukiara.

- e) **Alsut rait pali kumi kaia kulkanka lâka:** Lâ daukanka nani aslika daukanka sut ba trai munbia upla nani sut ra kumi baku kulki ba tânka alkaia kumi ra kau kulkanka yabras waitna o mairin ba tâka mita, baku sin ai manka, kiamka bara skahwa tânka ra sin kaikras. Kasak trai munaia upla raitka nani ra rispik lâka an pura kaikanka yabaia, wan dara wali uplika nani tilara iwanka natka ra sât sât banhwi ba, lalah tani ra, ai wîna tara bara upla baku tânka ba, baku lika alsut ba kumi baku kulkanka lukanka nani ba wapnika mangkaia dukiara.
- f) **Wîna aiska ra kaikaia kulkanka lâka:** Mairin nani karnika ni saura munanka tilara ba kaina kahbanka ba dukiara, nit sa nahmuna hilpka bribia: doktor nani, lâ kaiki nani, sinska tânka bara upla baku ba sut laki kaiki banhbia, wîna aiska ra bara pua kat, bara baku sip kaia ai raitka nani ba tânka plikaia, kaina kahbaia bara tiwan kaka kli laki yabaia.
- g) **Gabamint lâ kat wats taki kira kaia kulkanka lâka:** Gabamint ba ai warkka baku blestu diara kum daukaia sa tânkira pali bara baku sip kaia mairin nani mapara karnika ni saura munanka ba yaka takaia apia, tânka turbaia, panis munaia bara danh âpu daukaia; baku lika sip kabia karnika ni saura munanka trabilka tilara banhwi ba rayaka an wîna tara ba yaka yamni kabia bara kaina kahbanka sin pain bribia.

h) Tuktan brinka kau tara ba kulkanka lâka: Tuktan mairin, tuktan waitna bara wahma/tiara aihwa apia ai brinka kau tara bri ba tânka sika dîa dîa witin nani pâwanka aiska ra tâ baikanka yabia ba, nahmuna natka ra: wîna tara ra, sinska tani ra, wapanka yamni, ai iwanka natka bara upla nani tilara iwanka ba, ai sinska nahki ai tâura auya ba snaya ra nahki hilpka yabia ba pâwanka kau tara ba kat bara kau pali ba lika naha lainka ra: ai raitka nani, ai prika lâka nani bara aiska pali trabil âpu iwaia ba marikanka, ban alki brinka, âuyapah daukanka bara painka kaikanka ba.

i) Kulkanka mayara yabanka mapara dukiara kulkanka lâka: Baha sika sâtka wala kulkanka, sait ra lakanka o diara kum kum sip briras ba danh âpu daukanka, baha sut ba ai putka brisa nahmuna tânka nani ra: aisubi takanka, ani kuntrika wina ba, pulitik tani ra lukanka, dîa kiamka wina ba, ai manka bri ba, waitna o mairin ba, dîa bîla aisi ba, ani relisanka bri ba, dîa lukanka bri ba, ani wina aula ba, lalah bri o âpu ba, upla tilara nahki kulki ba, aisubi takan wina o trabil kum mita ai wîna ra skahwa ba, upla baku ai raitka nani bara ai prika lâka aihwa nani bri ba ra kulkanka yabaia apia o danh tikaia. Baku sin kulkanka mayara yabanka baku brisa ani daukanka nani o daukras dukia nani ai lukanka briras kabia ba kulkanka mayara yabaia, sakuna rait pali kulkanka mayara yabanka baha wina bal takbia.

- j) Snaya ra saura munanka wala briaia apia kulkanka lâka:** Gabamint bui blestu yaka Lâ Daukanka nani Aslika lalka tara nani ba bara aipaswanka wala nani bui karnika ni saura munanka ba laki kaiki, kainara ridi dauki ba, tânka turbi bara paniska yabi banhwi ba, kainara ridi kaia natka kau pain nani nikbanka daukaia sa, bara baku lika pâtka tilara uplika nani ra yaka takbia apia kulkanka yabras tânka nani, bahki ra baman kli kli daukanka nani bara trabilka nani sin.
- k) Karnika ni saura munanka briaia apia dukiara kulkanka lâka:** Mairin nani mapara karnika ni saura munanka ba lika upla nani pri lâka kau tara bri ba ra taiban natka ra saura munanka kum sa, upla raitka nani ra kulkanka, lilia brinka bara alki daukanka ba aiska o wiria baman yaka dauki.
- l) Mairin ba mita waitna wal kumi baku kaia kulkanka lâka:** Upla sâtka pana pana tânka nani ba ai putka baku bri kaia sa nahki waitna ba mairin wal baku aihwa sim sât ba, ai putka baku briaia apia sa karnika o purara taibanka tânka ba, nahki waitna bui mairin ba ai mina munhtara brisa, taibisa o trai munisa dâa dauki ba sut pura kaikaia.
- m) Pât tilara uplika nani ra kaina kahbanka kulkanka lâka:** Panis briaia aitani daukanka nani uplika nani ra daukan nâra ulbi banhwan na, ai raitka bri

banhwisa lâ dadaukra tâura uplika nani ra bara warkka ba prisant dauki yabaia bara sin trabil âpu istikira dauki natka ra, bahki ra wihka takaskanka o taim tiki daukanka nani âpu bara lâ ulbi sakanka kum briaia Lâ bui piua nani mangki ba bilka kat, pâtka daukan o dahra sakan uplika nani raitka ba mayara iki o sirpi sin daukras kira.

n) Param kakaira sakanka kulkanka lâka: Lâka daukanka ba upla sut mawanra daukan kabia, sakuna ban kra karnika ni saura munanka ai purara brin uplika ba makabia lika, upla lâka dadaukra aslika ba lukbia kau pain kabia lâka ba aiska o pîska kum ba dur praki daukan kabia, baku daukaia lukbia kaka saurka ai wîna ra munan uplika ba ra kaina manis wina an piua kat maisa pakan kaia sa, witinka ba sip sa naha raitka na ai hilpka baku briaia.

ñ) Saura munanka kum mana aibapanka kulkanka lâka: Upla lâka dadaukra nani mita tânkira laki kaikbia dîa natka nani nit ba, bara baku lika ai wîna ra karnika ni saura munanka brin ba sip pali kabia briaia saura munanka mana aibapanka ba bara saurka ba reper munaia, apia kaka mana aibapanka nani kasak bara aitani wala nani, ai painka tawa tawa yamni taki waia ba pîska kum baku.

Baiki Sakanka 5. Tâka pliki kaikanka yabalka nani

Naha Lâka tâka pliki kaikanka yabalka nani baku bri ba lika: Nicaragua Gabamintka Pulitik Lâka Bapanka Tara bri ba, Dîa dîa Lâka nani, Upla Raitka nani dukiara Kuntri nani bui Lâ nani bara Ulbanka sâtka nani sakan ba, bara Nicaragua Gabamintka bui sain munan an kulkanka aihwa baku yaban ba.

Kau pali ba, naha Lâka tâka pliki kaikanka yabalka nani ba naha nani kabia:

- a) Mairin mapara kulkanka mayara yabanka natka nani sât sât ba danh âpu daukaia Asla Takanka Tara ba; bara
- b) América Kuntrika nani Asla Takanka Tara ba, mairin mapara karnika ni saura munanka ba kainara ridi kaia, panis yabaia bara danh âpu daukaia dukiara.

Baiki Sakanka 6. Upla nani tilara dimanka ba

Upla nani sut ba ai asla takanka nani bâk, ai raitka bara blestu daukaia dukia baku brisa wilinkira pali tilara dimaia, naha Lâka ra dîa ulban ba aiska pali alki bara tânkira daukbia dukiara.

Art. 7. Mairin nani raitka nani ra kaina kahbi ba

Mairin nani sut ba ai raitka brisa upla sut mawanra bara ai watla bîla kat ai rayaka ba pri lâka ra iwaia karnika

ni saura munanka âpu lainka ra, baku sin ai prika lâka bara waitna wal prawaia an luhpa sahwaia dukiara, baku sin upla baku ai raitka nani bara ai prika lâka nani sut bri ba ra kulkanka yabanka, âuyapah brinka, alki daukanka bara kaina kahbanka ba, baha sut lika kulkanka yaban ba Nicaragua Gabamintka Pulitik Lâka Bapanka Tara bri ba bilara, upla raitka nani dukiara kuntri bîla kat lâ nani mangkanka lainka ra bara kuntri wala nani ulbanka nani ra.

Naha raitka nani bilara sa, wala nani tilara:

- a) Ai rayaka ra rispik munaia raitka ba; bara raya iwi kaia karnika ni saura munanka lâka âpu bara sin kulkanka mayara yabanka âpu;
- b) Wîna tara yamnika bara skul sinska briaia raitka ba;
- c) Upla baku ai wîna tara ba, ai sinska, ai wapanka, wîna brinka, prapati o lalah tani ra ai raitka bri ba ra rispik munbia raitka ba;
- d) Pri lâka, upla baku trabil âpu iwanka bara dîa dauki ba uplika baman nu kaia raitka ba;
- e) Dîa lukanka bara ai sinska ra nahki pri pali lukaia ba raitka;
- f) Saura muni panis yabanka nani, upla baku uba saura muni ba bara kulkanka tânka mayara alahbanka nani ra dingkaia apia raitka ba;

- g) Upla baku ai kulkanka asla mita sip dakwi takras ba ra rispik munbia raitka ba, baku sin ai pamalika ra kaina kahbia;
- h) Lâ mawanra bara Lâ bui alsut ra dauki ba baku witinka ra sin kaina kahbanka raitka ba;
- i) Sturi nani briaia bara kupia kraukanka pain briaia raitka ba;
- j) Hilp sirpi kum bara istikira briaia raitka ba lâ daukanka nani aslika Aipaswanka nani bara Gabamint Aipaswanka nani wala mawanra, ai raitka nani mapara saura munbia daukanka nani mapara kaina kahbia dukiara; bara
- k) Upla nani mawanra wal baku kulkanka bri kaia raitka ba bara upla nani ai warkka nani dauki ba tilara dimaia, baha tilara lukanka nani kahbaia tânka sin.

Baiki Sakanka 8. Mairin mapara karnika ni saura munanka natka nani

Mairin ra karnika ni saura munanka ba ai natka nani bara ani ani pliska sut ra, kulkanka yaban kaia sa kulkanka mayara yabanka bara wal baku kulkras marikanka kum baku, baha sika mairin nani mapara taki ba karnika briaia natka nani ra, baha sika Gabamint bui kulkanka yabisa upla sut tilara wîna tara yamnika

trabilka kum baku, sim baku upla nani trabil âpu iwanka bara kau pali ba lika:

- a) **Mairin nani ra misbara kaikanka:** Baha sika mairin nani ra misbara kaikanka daukanka nani bara latan bal takisa witin ba mairin ba mita baman mapara daukanka saurakira nani bara aihka pali mariki banhwi ba.
- b) **Karnika ni wîna ra saura munanka:** Baha sika daukanka kum o daukras ba bara sim tâka mita mairin rayaka aiska ba trabil ra dingkisa, baha bui ai wîna tara ra insauhkanka kum yabi ba.
- c) **Gabamint warkka daukanka ra mairin mapara karnika ni saura munanka:** Baha sika dauki ba gabamint lalka nani o warkka taki nani mita, baku sin skul tara diman uplika nani, upla nani bara asla takanka o gabamint wal wark taki nani ba, baha lika ai bapanka baku bri kabia ba mairin nani ba yaka ai lâka nani daukbia bara upla mawanra pulitikka nani ba yaka wihka wabia, mapara kaia, yaka bribia apia o ban swika tiwbia.
- d) **Wark tani ra mairin nani mapara karnika ni saura munanka:** Baha mita sika mairin nani ra saura muni ba gabamint o upla nani silp ai warkka dauki ba dukiara bara yabalka praki ba wark sâkbia, kantrak ra takbia, lâ ba kat pidi briaia ba bara wala nani ra baku yabaia ba, baku sin baha

sim warkka tilara traipka kau sunaia, trabil briras o ban taki kaia ba, diara tãnka nani taibi makabi ba marit o mayas baku, yapti o yapti apia ba, aparit bahmuna brin sapa, ai wîna daukra ba, kwihra sapa saun munanka o VIH/SIDA bri sapa laki kaikanka o bahmuna saun munanka wala mairka ba ai wîna tara nahki ba kaikaia dukiara. Baku sin kulkanka saura baku kaikisa mairin nani mapara karnika ni saura munanka ba wark taki ba tani ra, baha sika sim tâska o warkka daukan mana sim praiska aibapaia. Baku sin, baha tilara dingkisa sinska ra natka aihkakra kum ra trabil munaia wark tatakra mairka kum dukiara, witinka ba ai warkka ba wina mahka sakaia dukiara.

- e) **Prapati nani bara lalah tani ra karnika ni saura munanka:** Daukanka o daukras dukia kum, baha wina aisawanka kum, lus tiwanka, sait ra sakanka, sauhki tikanka, alki takaskanka o wan sinska wal pain kaikras diara nani ra, upla silp ai wauhkataya nani bri ba, kulkanka aihwa nani, prapati baku bri ba raitka nani o lalah bahmuna bri ba ai nitka nani ba wapnika mangkaia dukiara, mairin kum prapatika nani bara silp ai dukia nani ba o pamali bilara o ai maritka wal sakan ba.

Baku sin kulkisa prapati nani bara lalah tani ra karnika ni saura munanka ba tilara sa ritska nani bara lalah nani bri ba, baku natka ra mairin purara karnika ba

brih ki, utla bilara dña dña dukia nani nit ba yabaia apia wiaia ba, wan watla bilara nahki mairin wark taki wina lalah saki ba kakaira apia baku bara taibi muni ba wark taki ai mana bri ba mahka swibia o wark wala kum ra dimbia apia dukiara.

f) Sinska tani ra karnika ni saura munanka: Wark daukanka o daukras dukia ai bapanka baku bri ba mairin warkka nani, ai daukanka nani, dña dukia nani luki ba bara ai lukanka nani ba sut saura kulkaia o pura kat kaia, baha lika sibrin dingkanka, warbanka dauki, taibi baku muni, wal praki kaikanka saurakira nani, sam taim o pua bani watska takanka bâk, sturi saura nani wi ba, saura munaia wisi dairik o natka wala ra muni ba, mayara kulkanka, sait ra laki swi ba o daukanka wala kum mita ai sinska ra siknis baku yabi ba, silp ai lâka bapanka nani bri ba o upla baku witin pâwanka bri ba.

g) Karnika ni saura munanka wîna brinka tani ra: Daukanka bani mita mairin ra taibi muni ba ai wîna brinka dukiara, ai wîna ra kangbi o wal sturi aisi, apia kaka wîna brinka sâtka wala nani pana pana briaia nahmuna natka nani bâk: paun yus munanka ba, sirang ikanka, alki takaskanka, upla sut mawanra nina sauhkanka silp ai dukiara hilpka kum sakaia dukiara, mana aibapi kupia alkanka, warbanka daukanka, saura munaia wiaia ba o natka wala kum

bui ai kupia lâka o ai prika lâka wal wîna tara brinka tikbia o mayara ikbia ba, saura muni waitnika mairin kum bri kaia sip kabia sin witin wal marit baku iwaia o brisa baku marikaia, latwankira o pamali baku natka ra.

ULBANKA PUTKA II

SAURA DAUKANKA NANI BARA PANISKA NANI KAHBANKA DUKIARA

Sapta Kumi Baman

Mairin nani mapara karnika ni saura munanka saura daukanka nani bara ai paniska nani kahbi ba

Baiki Sakanka 9. Mairin ra ikaia ba

Mairin ra ikaia saurka tara ba daukisa, ani waitnika bui waitna nani an mairin nani wal paunka wal kumi baku apia ba tânka ra, mairin kum ra ikbia ba upla sut mawanra o upla âpu pliska ra, nahmuna tânka nani ulbuya na talika ra:

- a) Pât taki bahki ra baman mairin kum wal briaia trai munan ba, apia kaka ikuya mairka ba wal brih iwaia;
- b) Dukia ba takbia piua ra bri kaia, apia kaka ikuya mairka wal prawan kaka pamali natka ra, wal marit baku brih iwaia, wal “man prawi o kut muni kan,

pâna laka, pren lâka, wark tani bilara wal kakaira takan, skul dimi natka ra o pura kaikanka bahmuna ra;

- c) Mairka ikuya ba mapara karnika ni saura munanka marikanka kli kli dauki kan ba tâka mita;
- d) Dakni nani aidul natka ra wark nani dauki mita takan ba, “pandilla” nani, “arma” nani sât sât yus muni o munras;
- e) Mairka ikuya ba wîna tara ra uba saura kaiki mita wîna brinka nani ba dauki âuyapah takaia, apia kaka mairin ai wîna pîska ba klaki taih dakbaia o klaki tamanka wala nani bahmuna;
- f) Mairin nani ra misbara kaikanka bâk;
- g) Saurka ba mairka ra ikuya ba luhpia mairin nani o waitna nani mawanra daukuya taim;
- h) Saurka Tara Paniska baku Ulbanka Bapanka ra upla ikaia saurka tara nani nina ulban bahmuna kum baku takuya kaka.

Saurka ba upla sut mawanra takuya kaka, paniska ba lika silak watla ra mani 15 wina 20 kat kabia. Wal □man yukuwan ra baku daukuya kaka, paniska ba lika silak watla ra mani 20 wina 25 kat kabia. Natka nani wâlsut ra ulbanka sirpi nani luan ra mangkan bahmuna wâl o

kau pura takbia kaka, paniska kahbanka kau tara ba kahban kabia.

Paniska nani dukiara numba luan ra ulban ba, baikanka yumhpa wina kumi dauki kau purara sunan kabia mairka ra ikan ba bahmuna natka nani wina kumi takan kaka, numbika kau tara ba lika silak watla ra mani yawanaiska pura matawalsip.

Baiki Sakanka 10. Karnika ni wîna tara ra saura munanka

Waitna nani ba mairin nani purara karnika bri mita wîna ra karnika ni saura munanka yabuya kaka, naha Lâka ra latwan yabanka nani mangkan na wina kum daukbia kaka, ai purara naha paniska mangkan kabia:

- a) Latwanka sirpi nani yabuya kaka, paniska yabia ba lika kati 8 wina mani kum kat, bara silak watla ra kati walhwal kabia;
- b) Latwanka tara nani yabuya kaka, paniska yabia ba lika silak watla ra bâra kabia mani wâl bara kati 8 wina mani kati 6 wina 8 kat;
- c) Latwanka tara nani pali yabuya kaka, paniska yabia ba lika silal watla ra bâra kaia mani 7 bara kati 6 wina mani yumhpa bara mani 13 wina kati walhwal kat.

Art. 11. Karnika ni sinska ra saura munanka

Ani uplika ai daukanka o daukras ba wal nina sauhkaia lukanka wal, dña dukia nani dauki ba pura kaikaia, nahki tauki ba bara dña lukanka nani bri ba ani mairka ai maritka kan ba, wal bri kan kuna swin ba, witinka wal brih ki asla iwi ba, witinka wal bri kan kuna mahka swin ba, wal kut muni ba, wal kut muni si swin ba, wal ai tânka purara wi ba, wal ai tânka munhtara wi ba, wal ai pamalika pali ba sim tâlia bri ba mita, wal asla bara bahmuna tânka wala mita pana pana ba; dairik o daukaia apia baku saura munaia luki ba, baku sin sibrin dingkanka, warbanka daukanka, mayara kulkanka, sait ra laki swi ba, bîla ni sturi tâski nani wi ba, watska taki tauki ba, sauhkaia dukiara praki kaikanka nani, upla sut mawanra nina sauhkanka, nina kat tauki ba, ris âpu saura munanka bara bahmuna daukanka wala nani baha wina balaia sip ba sinska sa siknis kum yabanka ai wîna ra silp kulkanka yabi ba o upla baku ai pâwanka bri ba mayara iwanka, baha sut mana naku panis yaban kabia:

- a) Sinska pali ra yaka saura takbia mita wan sinska tani ra daktar mihta ra kaia nit sa kaka, ai purara paniska kauhbia ba lika silak watla ra kaia kati 8 wina mani kum kat bara kati walhwal;
- b) Upla wîna tara pîska nani pliska wark taki ba, skul ra yus muni ba, pamali o upla nani tilara yus muni ba wina kum ra trabil takbia kaka bara wan sinska

yamnika hilpka kum briaia nit sa kaka sin, paniska purara kauhbia ba lika silak watla ra kaia mani wâl bara kati 8 wina mani 6 bara kati 8 kat;

- c) Ban kra sinska ra siknis kum takbia kaka daktar nan diara lan mita kaikbia sin bara uplika ba ai sinska danh kli sip rawras sa kaka, paniska purara kauhbia ba lika silak watla ra kaia mani 6 bara kati 6 wina mani 13 bara kati walhwal kat.

Baiki Sakanka 12. Prapati nani bara lalah tani ra karnika ni saura munanka lâka

Prapati nani bara lalah tani ra karnika ni saura munanka baku kulkisa, waitna kum mita mairin ra daukanka o daukras dukia ba, baha tâka mita wal brisa kaka an sim tâlia, naha piua ra wal bri ba, wal bri kuna mahka swin ba, wal taim kum bilara asla ba, wal taim kum bri si mahka swin ba, wal kut muni mairka nani, wal kut muni kan mairka nani, wal latwan lâka tânka ra iwi ba bara baha daukanka sut tâka mita naha dukia nani takbia ba:

- a) **Prapati nani saki bri ba:** Ani uplika mita mairin kum ai dukia manira nani o prapati nani bri ba sâkbia kaka taitilka bri ba ra uya kaikras, paniska purara kauhbia ba lika silak watla ra mani wâl wina matsip kat. Baha sut ba lika prapatika nani sakan praiska ba kampani bahmuna ra kati kum ai mana bri ba sut asla kulki kau pura sa kaka.

- b) **Prapati nani ra saura munanka:** Ani uplika mita ritska o prapatika nani sauhki tikbia, yus âpu daukbia, yaka lap tiwbia o sauhkbia kaka, ai mihta ra bri ba, baha purara karnika bri ba o ai dukia baku ba wina sait ra, paniska purara kauhbia ba lika silak watla ra kabia mani wâl wina matsip kat. Baha sut ba lika prapatika nani sakan praiska ba kampani bahmuna ra kati kum ai mana bri ba sut asla kulki kau pura sa kaka.
- c) **Prapati briaia raitka yabaia apia wi ba:** Mairin kum silp ai prapatika o pamali mita yaban prapatika ba ya ya kra mita yaka bribia apia, alki takaskbia o baha yus munaia apia wibia ba, baku sin baha nani warkka tâura kaia apia, bara baha nani sât wala dauki bara kumi o alsut dawanka takaia lukbia ba, ai purara paniska kauhbia ba lika silak watla ra mani kum o yumhpa bâra kabia.
- d) **Pamali wark dauki lalah saki win taki ba sait ra lakanka ba:** Ani uplika bui pamali wark dauki lalah saki win taki ba sait ra lakbia kaka, bara baku sin baha nani bribia kaka silp ai hilpka dukiara bara baha tâka mita mairin raitka nani saura munuya kaka, ai purara paniska kauhbia ba lika silak watla ra mani wâl wina walhwal kat bâra kabia.

- e) **Mairin ra lalah yabaia apia wi ba:** Ani uplika bui karnika ni saura munanka, saura munaia wiaia ba, sibrin dingkanka o taiban natka ra upla kum ra ai kupia lâka apia kan yaban dauki ba sât sât natka ra, ban bâra aiska o pîska kum ra munka bâra sa kaka, ai purara paniska kauhbia ba lika silak watla ra mani kum wina yumhpa kat bâra kabia.
- f) **Plun nani bara wark yabaia raitka ra apia wi ba:** Ani uplika mita utla bilara nitka bri dukia nani ba yabaia apia wibia kaka, baku sin mairka ra taibi munuya kaka wark bri ba mahka swibia o wark wala plikbia apia, ai purara paniska balbia ba lika silak watla ra mani kum wina yumhpa kat mangkan kabia.

Baiki Sakanka 13. Mairin mapara sibrin dingkanka o saura munaia lukanka

Ani waitnika ai bîla aisanka nani, ulbi, “Internet” bahmuna ra sturi nani ulbia o dîa dîa natka wala wal mairin kum ra sibrin dingkbia o saura munaia wibia kaka bara witinka wal asla kan ba wal sim tâlia bri, wal pain ai tânka brih, pura kaikanka natka ra banhwi ba, witinka wal na minit bri, witinka wal bri kan kuna swin ba, wal pain asla iwi, wal pain asla iwi kan ba, wal naha piua ra kut muni, wal kut taki kan kuna swin ba, wal latwan baku brih iwi; saurka tara kum witin ra munbia bara rait aihwa wîna tara, sinska ra, wîna brinka, wark tani ra o prapati tânka

kat sa kaka, ai purara paniska kahbia ba lika silak watla ra kati 6 wina mani kum kat kabia.

Paniska ba kati 6wina mani wâl kat kabia silak watla ra, nahmuna trabilka nani wina kum takuya kaka:

- a) Sibrinka dingkanka o saura munaia wi ba mairka watla ra o witin takaski ba ra takuya, pamali nani watla ra, pâna nani o ani ani pliska ra witin yukuwan ba ra kaka;
- b) Saurka ba mairka ra ikuya ba luhpia mairin nani o waitna nani mawanra daukuya taim;
- c) Saurka dadaukra uplika ba gabamint warkka tilara sa, apia kaka pulis o “militar” daknika tilara si baha daukbia kaka;
- d) Saurka ba skiru kunhku an tatwa nani wal daukuya kaka, sawika pali ra sabi, apia kaka bulit lulki dukia nani o diara wala kum yus muni upla wîna tara bara wîna yamnika ra trabil munaia sip ba.

Baiki Sakanka 14. Luhpa waitna nani o mairin nani mihta dakbanka

Aisika o pamali tila wina wala kum bui mairka ba mapara karnika ni saura munanka daukbia o daukan kaka bara bahmuna dukia dauki witinka ba mapara karnika ni saura munanka daukaia dukiara, ai luhpia

waitna o luhpia mairin ba ai yaptika mihta wina saki bribia kaka, witinka lika lâ tânka kat witinka ra main kaiki ba, baku sin pura kakaira o witinka pakaia warkka yaban ba bara ai kupia lâka apia wal ban bri kabia kaka, ai purara paniska kahbia ba lika silak watla ra mani wâl wina walhwal kat bâra kabia.

Baiki Sakanka 15. Wark tani ra karnika ni saura munanka

Ani uplika mita mairin nani wark takaia ai raitka bri ba mapara o baha daukaia sanska yabras kaka, nahmuna lâka tânka nani bapan ba tâka mita: mairin ba mita, ai manka bri ba, wîna daukra nahki ba, marit sapa, yapti sa o baku apia sa, saun munaia pliska nani ra taibi muni yaban laki kaiki ba, VIH/SIDA bri sapa saun muni laki kaikanka, apia kaka bahmuna sâtka wala bara baku nu takaia kwihra apia ba, dimi waia yabalka prakbia o ai lâka mangkbia, pidi briaia ba, purara uli waia o mairin nani ai warkka wina sakras dukiara, bahmuna saurka ba panis yabia ba lika aibapanka baku yu nani 100 wina 300 kat.

Gabamint daknika o silp ai lalahka wal wark dauki kum bui warkka dukiara aisisa kaka, ani uplika mita kulkanka mayara yabanka daukisa kaka, paniska kau tara ba ai purara kauhbua. Baha sut ba ulbanka putka 125 ra, Lâ Numba 641 wina, “Saurka Tara Paniska baku Ulbanka Bapanka”ra pana pana ai warkka bri ba ra saura munras.

**Baiki Sakanka 16. Upla sut mawanra wark
daukanka ra mairin mapara karnika ni saura
munanka ba.**

Ani uplika gabamint tilara ai warkka dauki ba piuma ra, dfa warkka pali taura kabia sin trabil apu, kunin natka ra daukanka, wihka brih wabia, trabil munbia o yaka mairin ba ani aipaswanka ra auya ba ai raitka ba piuma kat yabia dukiara, naha Laka mita karnika yabi raitka nani yabi tanka ba yabalka plikaia dukiara, paniska yabia ba lika yu 200 wina 500 kat saki lalahka aibapaia bara warkka wina saki muni kati yumhpa wina 6 kat sait ra kabia. Baha wina apis warkka ra diara nani daukaia bri ba ra trabil yabras sa.

Dukia nani taura nina manan na pain ai dara walras mita yaban takuya kaka, paniska yabia ba lika yu nani 100 wina 200 kat aibapaia, bara warkka wina sait ra swiaia kau piu wihka baku kati yumhpa.

Daukanka nani taura marikan ba taka mita kler pali mairin rayaka bara ai wina painka ba trabil ra dingkuya kaka, paniska ba lika silak watla ra kati 6 wina mani kumi kat bara kaia bara warkka wina sait ra swiaia warkka ba sim piuma bilkara alki daukaia dukiara.

Baiki Sakanka 17. Dusa kuhbaia kan daukras ban swi ba

Ani uplika nani upla lâka dauki paniska yabi ba kat upla sut mawanra daukan saurka nani blestu dahra sakaia bri ba, ani pua ra nu takbia taim mairin kum, tuktan waitna, tuktan mairin o tiara aihwa apia mapara karnika ni saura munanka kum takan sa, witin nani blestu saurka ba dahra sakaia sa Nicaragua Puliska nani ra o Upla dukiara Gabamint tilara Wark Tara dauki Daknika ra 48 awar nani kau luras bilka ra. Naha takan dukia kaikan uplika kuna aisaras kan ba, ai purara lalah aibapbia 200 wina 500 kat.

Baiki Sakanka 18. Mairin ra alki wal yapaia saurka munaia lukanka ba blestu dahra sakaia

Wark pliska nani ra lalka kau tara ba, skul smalkanka baku o wark wala kum ra, witin kakaira sa kaka wîna tara brinka dukiara ris yabras, nina kat ba daukanka nani takisa witin karnika munhtara o dairiksanka ra uplika nani mita bara dahra sakras kaka Nicaragua Puliska nani ra o Upla dukiara Gabamint tilara Wark Tara dauki Daknika ra, witin ra yabia paniska ba lika lalah aibapaia yu 50 wina 100 kat.

ULBANKA PUTKA III

**HILP MUNANKA, KAINA KAHBANKA, LÂ PURA
LUI MITA PANISKA YABI BA, KAU DAUKRAS TAIM
WARKKA NANI BARA DAUKBIA APIA DUKIARA
KAINARA DAUKANKA NANI**

Sapta I

**Hilp munanka, kaina kahbanka bara lâ pura lui
mita paniska yabi ba natka nani dukiara**

**Baiki Sakanka 19. Hilp munanka bara kainara ridi
takanka natka nani**

Hilp munanka bara kainara ridi takanka natka nani dauki babpia ba sika tânka nani bara daukanka nani aslika ani uplika nani karnika ni saura munanka tilara banhwi ba kaina kahbaia dukiara, baha ba Gabamint bui blesti daukaia pîska baku, baha lika mairin nani ra witin nani trabil âpu lâka ba bara upla baku ai raitka nani yaka alkbia dukiara. Baha patrangka nani ba blestu naha lukanka bri banhwi kaia sa:

- a) Karnika ni saura munanka yaban mita mairka nani ra saurka takan ba dukiara hilp yabanka, lâ tânka nani smalkanka an sinska tani ra hilpka aihwa nani warkka nani ba mana luha yabaia.

- b) Saurka dadaukra uplika ra kli sinska smalkanka nani aiska yabaia, tânkira nani bara mana luha dukia nani, ai lukanka bara ai daukanka saura nani bri ba danh swiaia dukiara, sinska smalkanka kum yabi, baha mita yaka upla nani tilara waitna ba kau karnika brisa lukanka nani bri ba tikaia dukiara, baku sin waitna patrangka nani bri ba bara baha tâka mita ai karnika ni saura munanka lukanka bal takan ba.
- c) Trai munaia saura munan uplika bara saurka dadaukra ra laki kaikanka yabia ba sim uplika mita bara sim pliska ra daukaia apia. Piuu kumi ra sin laki kaikanka daukbia apia baha uplika nani karnika ni saura munanka daukan tâka mita panis munan ba ra.
- d) Saurka dadaukra wihki saura munan uplika ba trai muni yaka sait ra bara laihura banhwi kabia.
- e) Yukuwi bâra kaia pliska nani ba pain dauki muni karna daukaia saura muni uplika nani, ai luhpia mairin bara waitna nani ba dukiara, baha pliska nani ra sika sinska ra bara lâ tânka kasak nani bara mana luha yabi banhbia ba.

Baiki Sakanka 20. Pât tilara uplika nani ra hilp munanka dukiara natka nani

Saura munan uplika nani ra hilpka yabaia dukiara natka nani ba naha nani sa:

- a) Upla sut ra bara silp ai pliska kat hilpka nani yabi nani bahmuna kau yaka takaia, baha nani mita tânka sât sât ra hilpka nani yabia ba, baku sin sinska tânka manis lainka ra karnika ni saura munanka brin ba mairka nani dukiara;
- b) Trai munaia upla nani hilp pliki ra tâ baikanka nani yabi ba, apia kaka upla sut dukiara bara silp ai pliska kat bahmuna warkka dauki ba, saura munan uplika nani ra hilpka kum pain bara kasak yabi banhbia witinka nani aikuki baman bara srinhka kumi sin âpu, ai dara pain wali kabia saura munan uplika nani ba lika wîna aiska ra bara sinska tani ra sin uba karnika âpu banhwisa;
- c) Wîna yamnika aiska hilpka nani yabaia mairin nani dukiara, kau pali lika mairin ba tâka mita karnika ni saura munanka wina siknis nani bal takan ba hilpka yabaia dukiara.
- d) Tâura uplika ra sturka ba pliki sakaia, ulbanka ra sakaia bara mihta ra mangkaia, baha lika wîna tara bara sinska lainka ra tânka nani pliki sakan ba,

baha lika bal takan ba karnika ni saura munanka uplika nani wina, witinka nani sika auya ba upla ra wîna tara yamnika hilpka yabi bara lâ tânka kaiki nani ra, saura munanka ba mana paniska yabanka bara kli pain takaia ba dukiara.

- e) Saura munanka brin uplika nani ra wîna tara yamnika hilpka nani, tânka turbi kaikanka, tâ brinka o yula kahbanka yabaia, baku sin karnika ni saura munanka daukanka nani brin ba tâka mita dîa taki ba sturka nani, baha sut ba blestu istikira blikaia sa wîna tara yamnika o lâ tânka kaiki uplika nani ra, ani pali ra blikaia kabia ba ra.

Baiki Sakanka 21. Kaina kahbanka bara lâ pura lui mita paniska yabi ba dukiara natka nani

Kaina kahbanka bara lâ pura lui mita paniska yabi ba dukiara natka nani ba, blestu sa:

- a) Saura munan uplika ra sturka aiska wiaia bri ba blestu yabaia, dusa kuhbanka dingkuya ba wina ani pitka kat diara nani taki ba; mairin mapara karnika ni saura munanka dusa kuhbanka ai mihta ra bri ba bara tânka turbi ba mihta ra sa, dukia ba takaia kainara ridi kaia natka nani ba briaia bara kaina kahbanka natka nani ba makabaia dîa sip ba kat istikira, naha Lâka ra bapanka daukan na tânka kat;

- b) Daukbia apia dukiara kainara daukanka tânka nani bara kau daukras taim warkka nani baha karnika bri lalka nani mita ulbi daukan ba yaka aitani kat takbia, saurka dadaukra purara watska takanka nani dauki, saura munan uplika nani telepong wal riput nani yabanka, sins tânka tihu lankira nani mita hilpka yabi ba ra blestu wi kaia pura kaikanka nani;
- c) Upla pruan o saura munan tânka saun muni kaiki natka ba yaka sinskira bara diara lankira nani lâka nani mangki ba kat yaka daukaia, upla wîna tara saun muni kaikanka sinska tara kum ra lankira mita, baha ba aiska an tânka sât sât tani ra, baha lika ani uplika nani mairin ba mita karnika ni saura munanka mita ai wîna ra latwan bri ba;
- d) Lâ dadaukra nani plikaia yabalka ba tara daukaia lâ tânka, daktar bara sinska tani ra hilpka yabi mana aibapras natka ra, baha lika mairin nani karnika ni saura munanka trabilka bri banhwi ba dukiara;
- e) Ani uplika nani bara Lâ Dadaukra nani Aslika tilara banhwi ba ra smalkanka yabaia mairin ra kulkanka yabaia tânka kat;
- f) Kupia kraukanka bara smalkanka programka nani karna daukaia mairin tânka nani wal, baha lika lâ dadaukra nani dukiara bara baku sip pali kabia yabaia hilpka natka pain kum bara mairin nani

mapara karnika ni saura munanka tara ba danh âpu dauki banhbia;

- g) Upla nani trabil âpu iwanka pulitikka nani ra dingkaia natka kasak nani mairin ra iki ba yaka takaia apia, tânka turbi kaikaia, paniska yabaia bara danh âpu tikaia dukiara, baha nani ba tânka brih ki natka kau saura pali bâra ba mairin nani mapara karnika ni saura munanka tânka;
- h) Upla dimaia pliska nani, silp wan wîna ra hilpka yabi daknika nani bara saura munanka nani wina kli buaia warkka nani bukaia, baha lika mairin nani ra pamali nani bilara bara tawan sirpi ra kaina kahbaia dukiara; bara
- i) Natka nani kau nit bara kau pain nani ba alki briaia, nahmuna warkka nani dukiara: Upla nani wal bisnis dauki ba, mairin nani, tuktan mairin nani, tiara aihwa apia nani wal wîna brinka taibi munan dauki wina lalah saki ba bara wark dauki wina hilpka saki ba yaka takaia apia, tânka turbi kaikaia, paniska yabaia bara bahmuna saurka nani sut ba danh âpu tikaia dukiara.

Baiki Sakanka 22. Program nani warkka nani

Mairin nani mapara karnika ni saura munanka ba yaka takaia apia, hilpka daukaia, paniska yabaia bara danh

âpu tikaia dukiara programka nani ba, naha warkka nani bri kabia:

- a) Mairin raitka nani kakaira kaia bara alki daukaia tânka ba nikbaia bara karna daukaia;
 - b) Mairin nani bara waitna nani daukanka upla baku bara ai iwanka natka bri ba sât wala daukanka dukiara tilara dimaia, baha tilara dingki program paskanka nani bara skul aihwa an aihwa apia daukanka nani skul smalkanka bara sinska yabanka sâtka nani sut ra, upla nani tilara daukanka nani dukiara lukanka nani bri ba yaka takaia apia, hilpka yabaia, panis munaia bara danh âpu tikaia dukiara, baha mita sika mairin nani mapara karnika ni saura munanka ba munan takisa, yaban sahwise bara pain baku kulki banhwisa;
 - c) Ulbanka nani bahmuna witin nani ra yabaia bara baha nani mita yaka lâka nani ba mairin tânka ra kaiki ai warkka daukbia, naha Lâka ulbanka ra dîa win ba tânka kat, mairin nani ra upla baku ai raitka nani bri ba dukiara sinska yabaia, smalkaia bara spiritka bukaia:
1. Lâ Dadaukra nani Aslika ra warkka dauki mairka nani bara waitnika nani, baha tilara dingki Wihta waitna nani, Wihta mairin nani, Upla nani Lâ dauki Karnika warkka dadaukra nani, lâ dauki pliska nani

ra gabamint nina ra ai warkka dauki banhwi ba, pulis nani; bara

2. Mairin nani mapara karnika ni saura munanka warkka dauki mairka bara waitnika nani, witinka nani lika ai mihta ra ba baha saurka ba yaka takaia apia, hilpka plikaia, paniska yabaia bara danh âpu daukaia.
- d) Saura munan uplika nani ra tâ baikanka kasak nani bara mana luha yabaia, baha lika hilpka yabanka bara kaina kahbanka natka ra, karnika bri nani bara gabamint warkka tâura nani o silp ai warkka dauki nani bâk;
- e) Nikbanka daukaia sturi sasakra natka nani ba mairin lilka ba wîna brinka bisniska baku yus muni banhbia apia dukiara, baku sin mairin nani mapara karnika ni saura munanka ba tara dauki banhbiara, bara baku hilp briaia sip kaia mairin nani mapara karnika ni saura munanka sâtka nani sut ba danh tikaia bara upla raitka nani an mairin nani ra kulkanka yabanka ba karna daukaia;
- f) Saura munan uplika nani ra hilpka yabanka bara sinska marikanka programka nani paski yabaia, bara baha mita yaka ai rayaka tânka nani sut ra pain pali iwi kabia;

- g) Tâ baikanka yabaia tânka turbi kaikanka bara tânka laki kaikanka nani numbika ba pliki briaia dukiara dîa tâka mita mairin nani mapara karnika ni saura munanka nani aima an pali taki ba, bara baku sip kaia natka nani pliki brih alki daukaia karnika ni saura munanka sâtka sut ba kainara ridi kaia, hilpka yabaia, paniska yabaia bara danh âpu daukaia dukiara;
- h) Kati 6 bani ulbi kakaira sakaia mairin nani mapara karnika ni saura munanka tânka aiska bara numbika taki ba sin; bara
- i) Wan natka baku wilinkira dusa kuhbaia mairin nani mapara karnika ni saura munanka daukanka ba aipaswanka nani ai warkka kum pain dauki marikanka baku, witinka nani ba trabil âpu bara ai wîna mapa ra pain iwi kabia dukiara.

Gabamint aipaswanka nani ba ai karnika bri ba lainka bîla kat, naha Lâka ra bapanka nani kahban na blestu kulkaia sa, upla nani aslika tilara dimanka ra saura kulkras, baha warkka nani ba asla alki daukaia dukiara.

Sapta II

**Kau daukras taim warkka nani bara daukbia
apia dukiara kainara daukanka nani tânka bara
daukanka nani natka nani**

Baiki Sakanka 23. Kaina wina ridi takanka tânka

Daukbia apia dukiara kainara daukanka tânka nani bara kau daukras taim warkka nani na lika kainara ridi takanka bahmuna kulkaia sa, mairin ra saura muni ba kaina kahbaia dukiara ai wîna tara, ai sinska, wîna brinka bara prapatika nani tani ra, baku sin naha Lâka ra upla raitka nani ulban ba sut ra saura munbia o trabil yabaia lukbia ba mapara, bara baku lika sip kaia karnika ni saura munanka daukanka raya nani yaka takbia apia.

Baiki Sakanka 24. Daukbia apia dukiara kau kainara daukanka nani natka nani

Daukanka rait nani o daukras dukia nani wan mawanra kaikisa kaka bara baha ba saurka tara nani baku kulkisa kaka naha Lâka tilara, Nicaragua Puliska nani ba Mairin bara Tuktan nani Trabilka pura kaiki Warkka tâura ba bâk, baku sin distrit bara “municipio” nani bilara bâska nani o Upla dukiara Gabamint tilara wark tara dauki Daknika ba, witin nani sip kabia daukbia apia dukiara kainara daukanka tânka nani na adar yabaia bara yaka alki daukaia:

- a) Saura dadaukra baku kulki ba ra adar yabaia mahka pali watla ba wina taki wabia, dîa sât karnika bri ba ra sin lukras, ban kra karnika ni saura munanka ba trabil kum sa kaka mairka wîna tara, lukanka ra,

sinska biara ra, wîna brinka bara prapati nani bri ba mapa ra. Saurka dadaukra ba sip apia kabia utla dukia nani o baha bilara dîa dîa bâra ba saki brih waia. Witin ra adar yaban kabia brih waia witin yus muni dukia nani baman, diara nani, wark bara skul dimi tulska nani;

- b) Saurka dadaukra baku kulki ba ra adar yabaia apia o yaka dimaia apia mairka dimi watla ra, warkka pliska, skul dimi pliska, ani pliska nani ra witin kau waia lihki ba o ani pliska witin bâra ba kat, pliska yahpika ba lika kau mayara ba 200 “mita”. Saurka dadaukra baku kulki ba bara saura munan uplika ba sim pliska ra wark taki o skul dimisa kaka, naha adarka yaban kabia mairka wîna ra diara saura kumi sin takbia apia dukiara;
- c) Adar yabaia mairka ba kli ai watla ra dimbia, anira witin ra yaban dimras ba, apia kaka baha wina kangbi sakan ba karnika ni saura munanka wal, sibrin dingkanka o taiban natka ra ai kupia lâka apia kan baku munan daukan ba, watla ba ya pali nina ra ulbanka daukan ba tânka ra tawi kaikras. Sim lâka ulbi sakanka ra adar yabia saurka daukan baku kulki uplika ba baha wina taki wabia;
- d) Saura munan uplika ra hilpka pain yabaia doktor lainka ra, lukanka bara sinska biara tani ra nahki nit ba pitka kat;

- e) Adar yabaia tuktan waitna nani, mairin nani bara wahma/tiara aihwa apia nani ra daktar bui wîna tara, lukanka bara sinska biara ba saun muni kaikbia, witinka nani ra dairik o natka wala karnika ni saura munanka tilara banhwi kan ba bara dîa hilpka nit ba kat yabaia;
- f) Tuktan waitna nani bara mairin nani raitka nani karnika uya âpu ba saura munan dusa kuhbanka ba dukiara makabaia baha tilara dimbia Pamali, Wahma/Tiara Aihwa apia bara Tuktan nani Ministerioka ba. Sim baku sip kabia makabaia asla takanka nani bahmuna tânka nani kakaira pali ba ra, witin nani bui tâ baikanka, kaina kahbanka, smalkanka, kupia kraukanka bara dîa nit ba kat pura kaiki waia;
- g) Saurka daukan baku kulki uplika ra adar yabaia apia mairin ba mapara sibrin dingkanka, nina bliki taukanka, ris yabras nina kat tauki kaia o turbi munanka bahmuna daukaia, sim baku witinka pamalika uplika kum o dusa kuhbanka dauki ba ai uplika nani bri ba ra, witin silp mita o snaya wina upla wala nani bui, sturi bliki masinka sirpi “electrónico” mâki ba bâk, ulbanka ra bara wan kiama ni wali o wan nakra kaiki ba;
- h) “Arma” nani bulit lulki ba o skiru kunhku an tatwa nani bara latwan tara yabi ba bahmuna, saurka dauki

uplika baku kulki ba mihta ra sakuya kaka, baha dukia brih taukaia adarka bri o âpu kabia sin lukras, bara dña sât warkka bri o dauki ba sin laki kaikras. Bahmuna tânka nani sut ra, “arma” nani mihta dakban ba Nicaragua Puliska nani ra blikaia sa bara anira wih takaskaia ba lika kahban kabia lâ nani ra dña wi ba kat, baha sika Lâ Numba 510, “Kulkanka Tara bri Lâka ‘Arma’ nani bulit lulki ba, bulitka nani, baiwi dukia nani bara bahmuna tânka bri dukia wala nani Pura Kaikanka bara Rul Munanka”, Lâ Numba 228, “Nicaragua Puliska nani Lâka”, Lâ Numba 406, “Nicaragua Gabamintka Saurka Tara Paniska Lâka daukanka Ulbanka Bapanka” bara Lâ Numba 641, “Saurka Tara Paniska baku Ulbanka Bapanka”;

- i) Saurka dadaukra baku kulki ba ra adar yabaia apia ai watla ra “arma” nani bri kabia, pamali daknika tila wina uplika nani wina kumi ra sin sibrin dingkia, trabil yabaia munbia o saura munaia sip apia kabia dukiara.
- j) Pamali watla bilara dña dukia nani bri ba numbika kum kulki briaia sa, mairin bara ai luhpia nani prapatika ba kaina kahbaia dukiara. Naha warkka na daukbia naha baiki sakanka wina ulbanka markka a) bara c) ba kahbia taim; bara
- k) Adar yabaia mairin ba witin brih waia sip kabia ani prapatika nani mita witin ra bara pamali daknika ra

hilpka yabaia sip ba, witin baku daukaia lukbia taim, trabil briaia apia dukiara, ani watla saurka dadaukra wal dimi ba wina taki waia ba.

Natka nani nina mâkan na daukaia sip kabia wâlsut ai sirka briaia, tânkira, nitka bara istikira baku daukaia lukbia ba kat baman.

Baiki Sakanka 25. Daukbia apia dukiara kainara daukanka nani natka nani

Wihta waitna, Wihta mairin o Upla Lâka Dadaukra Apiska ba, Upla dukiara Gabamint tilara wark tara dauki Daknika bui o saura munan uplika mita witin ba dusa kakuhbra baku taki ba makanka daukbia kaka, sip kabia naha kau daukras taim natka nani na lâka bapaia:

- a) Uplika saura dadaukra baku kulki ba ra adar yabaia ai lukanka bara ai sinska biara ba saun muni kaikbia, baha lika wihta waitna o wihta mairin bui baha nit sa kulkbia kaka;
- b) Uplika saura dadaukra baku kulki ba ra aibapaia dukia nani aitani bri kaka purara kahbaia, baha lika Wihta waitna o Wihta mairin bui ai lâka mangkbia ba, mairka ra saura munanka nani yaban baku kaikbia ba mana aibapaia dukiara;
- c) Tuktan waitna nani, mairin nani, wahma/tiara aihwa apia nani o upla skahwa nani bui witinka nani na

piu prahni kum bilka ra upla kum mihta ra swiaia sa, ani uplika ra kaikka baha warkka daukaia sip sa kaka yabaia, baha nani main kaikaia ba saurka dadaukra baku kulki ba mihta ra kan kaka, naha Lâka ra saurka nani mangkan na bahmuna tilara ban kra bâra kan kaka;

- d) Saurka dadaukra baku kulki ba ra taibi munaia karnika ni saura munanka daukan mairka ba ra blestu yabaia, raya iwi kaia dukiara plun bahmuna nit taki ba, baha daukaia dukiara lalah ai mihta ra brisa kaka bara saurka dadaukra baku kulki ba bui stanka takisa kaka sin. Naha natka kahbanka ba piu prahni kum dukiara baman kabia, naha Lâka ra taimka kahban ba ai karnika bri ba pua kat;
- e) Saurka dadaukra baku kulki ba ra taibi munaia witin blestu plun nani yabaia sa luhpa waitna bara mairin nani ra, baha pih ki raya banhwi kaia dukiara, baha purara karnika bri tâ uplika ba wibia kat pata nani ba nahki praiska mangkbia, bahmuna dukia nani dukiara Lâ dîa win ba tânka kat;
- f) Saurka dadaukra baku kulki ba ai luhpia waitna nani bara mairin nani wih kaikaia raitka bri ba dakbaia bara pura kaikanka sanska bri ba, main kaiki ba, paki ba bara skul yabi ba sin klakaia, witinka nani na karnika ni saura munanka trabilka ra kaka o ai

yaptika bui main kaiki kan taim sin witinka ra karnika ni saura munanka takan ba pua ra, ai watla ra, main kaiki bri pliska o plis wala ra banhwi kabia sin bahara trabil âpu kaia dukiara;

- g) Wihta wina kaina kahbanka bara hilpka yabanka adarka kum sakaia, baha lika pulis nani lalka ra blikaia. Saura munan uplika ba naha ulbanka sâtka kum ai mihta ra bri kabia tâ uplika nani kau lamara ba kat waia sip kabia dukiara, ban kra ai mapara latwan munaia sip sa kaka ai watla wina latara o bilara;
- h) Lâ kat daukaia dukia nani ba yaka ban dauki kaia plun nani lainka ra, saurka dadaukra ra adar yabras daukanka nani bara kantrak nani daukaia prapati nani wan nakra kaiki dukia nani bara sâtka wala nani purara, baku sin prapatika nani saki brih waia ba ai watla brih dimi banhwi ba wina ani ani pliska ra. Wihta waitna o wihta mairin ba baha prapatika nani numbika ba kulki bribia, naha adarka nani kahbaia kainara bara dauki ba mahka swiaia kabia taim;
- i) Saurka dadaukra ra adar yabaia apia kaina kahbi bri uplika lamara wabia ani ani pliska ra bâra kabia sin, sim baku ai watla lamara waia, ai warkka pliska ra o ani pliska wala ra mairka ba waia lihki

ba. Wihta waitna o wihta mairin ba mita pliska pitka kum mangkbia saurka dadaukra wihki saura munan uplika bilka ra, baha wina luaia sip apia kabia, kan baku takbia kaka panis briaia trabilka ra kauhbia. Laihura kaia pitka ba sip sa kupia kumi natka ra daukaia, saura munan uplika o ani uplika nani ra kaina kahbaia lukbia ba prika lâka wal, witinka nani ba kainara pliska ba mahka swih wan kaka;

- j) Saurka dadaukra uplika ra adar yabaia apia prawanka sât sât nani bribia dukiara ani uplika nani marikbia ba wal, kaina manis wina maisa paki witin sip sa paniska kum ra kauhaia;
- k) Saurka dauki uplika ra adar yabaia apia “arma” nani brih taukaia dukiara;
- l) Dîa daukan tânka pliki uplika gabamint warkka bahmuna takisa kaka taimka yabaia, saurka daukan dukiara turbi ba ai warkka nani bri ba wal tânka brisa kaka; bara
- m) Saurka daukan baku kulki uplika ba plis wala ra waia adarka ba alki takaskaia.

ULBANKA PUTKA IV

**DAUKBIA APIA DUKIARA KAU KAINARA
DAUKANKA NANI TÂNKA NANI BARA DAUKBIA
APIA DUKIARA KAINARA DAUKANKA NATKA**

NANI NAHKI DAUKI BA BARA ALKI DAUKANKA

Sapta I

Daukbia apia dukiara kau kainara daukanka nani natka nani piu nahki waia ba dukiara

Baiki Sakanka 26. Daukbia apia dukiara kau kainara daukanka nani natka nani piu nahki waia ba

Daukbia apia dukiara kainara daukanka tânka nani ba kahban kabia saura munan o kupia sauhkanka brin uplika o asla takanka kum silp ai nina ra dauki, kainara ridi takanka natka baku piu kau yari ba yu 20 pitka, baha ba aima kumi baman kitbi brih wan kaia sip sa. Lâ ulbi sakanka mita natka nani o baha nani kitbi brih waia adarka yabi ba, brinka ba ra kaiki ulbi sakan kaia sa.

Lâka dauki ba mahka tâ krikuya taim, paniska yabanka o pamali natka ra, Wihta waitna o Wihta mairin makabanka daukbia taim, daukbia apia dukiara kainara daukanka tânka nani kahban ba alsut o kum kum ban bri kaia ba dukiara wapnika mangkbia, lâka nahki dauki auya tânka ba kat, baha sika witin ai karnika brih ki daukaia sip ba.

Ai lâka ulbi sakanka ra, Wihta waitna o Wihta mairin ba daukbia apia dukiara kainara daukanka tânka nani ba ulbanka ba ra kulkanka aihwa yabuya taim bara kau

daukras taim warkka nani ba adarka yabia ba ra, baha daukbia sinska lukanka aihwa ba wal, bara kasak wibia baha nani ba pitka kat sa bara sin nitka nani bri ba kat, taimka dfa pitka kat waia ba bapi, baha lika mani kum wina kau purara kaia sip apia kabia.

Wihta mairin o Wihta waitna ba laki kaikaia kabia kati yumhpa bani ban bri kaia nitka ba bara lâka ulbi sakanka ra lalah nahki prais tikaia bri ba snata alkbia o sât wala daukbia taim, wala nani lalah uya tiwras bahmuna ba wal sirka ra mangkbia. Ini minit natka nani tânka tara wal laki kaikanka ba daukan kabia, nitka bri uplika bui makabuya ba mita.

Sapta II

Daukbia apia dukiara kau kainara daukanka nani dukiara makabanka, alki daukanka bara karnika bri ba

Baiki Sakanka 27. Daukbia apia dukiara kau kainara daukanka nani natka nani makabanka ba dukiara

Dusa kuhbanka dingkanka daukbia taim, saura munan o kupia sauhkanka brin uplika ba, ani ani uplika o asla takanka kum silp ai nina ra dauki, sip kabia ai bîla wal o ulbanka ra daukbia apia dukiara kainara daukanka tânka natka nani ba ani uplika baha lâka kaiki uplika ra,

tânka wâlsut ra ani lalka baha ai mihta ra bri ba, sturka brin ba ulbanka kum sâkbia an baha ra naha tânka nani bri kaia sa:

- a) Pâtka brin o saura munan uplika nina nani, taitilka nani bara ani pliska ra takaski ba;
- b) Saurka daukan baku kulki uplika ba kakaira sakaia tânka nani, bara kakaira sa kaka watla ba sin;
- c) Saurka nani daukan dusa kuhban ba tânka, bara marikaia dfa marikanka nani kasak wal baha ra karnika yabisa;
- d) Daukbia apia dukiara kainara daukanka tânka nani daukaia sip ba sinska ulbanka; bara
- e) Ani pliska ra sturi nani briaia dukiara.

Baiki Sakanka 28. Daukbia apia dukiara kau kainara daukanka nani alki daukanka

Makabanka ba marikbia taim, baha daukaia karnika bri ba sim minitka ra adar yabia baha natka nani makaban ba tila wina kum purara kahbia. Ban sakuna, makabanka daukan ba ra saura munras, karnika bri uplika ba ai warkka tânka baku adar yabaia sip kabia natka wala nani purara kahbia, saura munan uplika ba wina ra, sinska, wina brinka bara prapatika nani tani ra kaina kahbaia dukiara.

Lâ ulbi sakanka bui daukbia apia dukiara kau kainara daukanka adarka yabi ba, blestu nu munaia bara alki daukaia sa baha ulbanka daukan ba wina 24 awar bilka ra, bara baha mapara hilpka dukia kumi sin âpu kabia.

Lâ ulbi sakanka ba maisa pakbia dusa kuhban uplika ra, wîna pali kat Mairin bara Tuktan nani Trabilka pura kaiki Warkka tâura ba bâk, apia kaka Nicaragua Puliska nani Lâ Daukanka ra Hilp Munanka Tâ Briatika bri ba, apia kaka Upla dukiara Gabamint tilara Wark Tara dauki Daknika ba. Maisa pakanka ba daukaia sip kabia saurka dadaukra baku kulki ba watla ra bara ani ani awarka ra, saura daukanka nani naha Lâka ra bapan ba dukiara.

Baiki Sakanka 29. Daukbia apia dukiara kau kainara daukanka nani bara daukbia apia dukiara daukanka natka nani alki daukaia bara watska takaia dukiara karnika bri Daknika

Daukbia apia dukiara kau kainara daukanka nani bara daukbia apia dukiara natka nani ba alki daukbia pua ra, tâ uplika baha bapbia ba mita baha nani nahki auya ba nina kat kaia sa.

Lâ dadaukra mita daukbia apia dukiara daukanka natka nani kahban ba alki daukanka bara dîa mangkan ba kat daukbia dukiara, naha tâ baikanka bribia Mairin bara Tuktan nani Trabilka pura kaiki Warkka tâura ba wina,

apia kaka Nicaragua Puliska nani Lâ Daukanka ra Hilp Munanka Tâ Briaika ba.

Saurka daukan uplika baku kulki ba mita naha Lâka ra bapanka natka nani kahban na wina kum kra kulkras kaka, mahka tânka turbanka kum daukbia tâ brabrira ra bîla walras o rispik lâka âpu tânka saurka ba mita.

ULBANKA PUTKA V

KARNIKA BRI AIPASWANKA NANI MAIRIN NANI MAPARA KARNIKA NI SAURA MUNANKA TÂNKA DUKIARA

Sapta I

**Tânka Tihu Kakaira Daknika nani paski muni ani
Pliska ra ai Warkka dauki ba dukiara**

**Baiki Sakanka 30. Tânka Tihu Kakaira Daknika
nani**

Distrit ra Lâ Watla nani Karnika ni Saura Munanka Tânka lankira nani ba paskan kabia, baha tilara kabia Wihta waitna o Wihta mairin kum, bahmuna tânka lan banhwi ba. Bâra kaia sa Distrit ra Lâ Watla nani Karnika ni Saura Munanka Lâka Tânka lankira nani ba kum pan tasba baiki sakanka tara tawanka lalka kumi bani ra bara Klauna Lâka Tasbaika nani an “municipio” nani ra, baha ra lika ani pliska pali ba tâka mita, tasba baiki

sakanka tara nani tawanka lalka nani ra Lâ Watla nani ra waia uba karna takisa.

Distrit ra Lâ Watla nani Karnika ni Saura Munanka Tâнка lankira nani snaya ra, sinska sât sât kakaira uplika daknika nani paskbia, tila ba ra bri kabia wan sinska daktarka kum bara Upla aikuki Wark dauki Mairka kum pan, witin nani warkka ba lika saura munan uplika nani ra hilpka kau pain nani ba yabaia, ani pliska ra dauki ba bilara tâ baikanka baku sturi aisanka walanka nani ra; bara Lâ dauki Watla wina kaina kahbanka nani mangkan ba pura kaiki bara watska taki waia dukiara.

Baiki Sakanka 31. Ani Tasbaya Baiki Sakanka nani kat Wark daukaia Karnika bri banhwi ba

Baha nani karnika bri kabia naha pliska nani kat lâ dadaukra nani dîa dauki ba kakaira kaia bara wapnika mangkaia dukiara:

- a) Tawan kat Lâ Watla nani Kumi Baman ba ai mihta ra brisa, pas tâura kakaira kaia saurka nani daukan dukiara lâka daukuya ba kat, baha nani tâнка sika naha Lâka ra ulbi marikan na bara paniska purara kahbia ba lika uya tara kaia apia sa. Lâ mawanra blikuya adarka ba aisan kabia taim, tâнка ulbanka marikanka nani ba blikaia kabia Distrit ra Lâ Watla nani Karnika ni Saura Munanka Tâнка lankira nani ba ra, ani pliska ra daukaia bri ba kat dauki ba ra.

- b) “Município” nani bilara Tawan kat Panis yabanka dukiara Lâ Watla nani bâra ba mihta ra sa, pas tâura kakaira kaia saurka nani daukan dukiara lâka daukuya ba kat, baha nani tânka sika naha Lâka ra ulbi marikan na bara paniska purara kahbia ba lika uya tara kaia apia sa. Lâ mawanra blikuya adarka ba aisan kabia taim, tânka ulbanka marikanka nani ba blikia kabia Distrit ra Lâ Watla nani Karnika ni Saura Munanka Tânkira lankira nani ba ra, ani pliska ra daukaia bri ba kat dauki ba ra.
- c) Distrit ra Wihta waitna bara Wihta mairin nani Karnika ni Saura Munanka Tânka lankira nani ba, pas tâura kakaira taki wapnika mangki banhbia, saurka nani daukan dukiara lâka daukuya ba kat, baha nani tânka sika naha Lâka ra ulbi marikan na bara paniska purara kahbia ba lika uya tara kaia apia sa. Saurka nani uya saura apia bara yahpa nani witin nani rul muni tasbaya pîska ra daukbia ba dukiara lika, baha Wihtika nani ba kakaira taki banhbia sturi aisanka walanka kainara dauki ba bara sturi aisanka walanka tâura dauki ba wina ai bîla aisanka wal bara upla sut mawanra dauki lâka daukanka ba kat.
- d) Karnika bri kabia kakaira kaia Makabanka daukuya ba tânka nani, baku sin Makabanka daukan Upla Lâka Dadaukra Apiska nani ra Paniska yabi Watla nani Tânka Tara bri ba, baha lika lâ ulbi sakanka

nani alki daukan ba bara daukaia lukanka bri kan mahka swi ba paniska kahban ba tani ra, daukanka nani wal tânka bri ba ai putka baku brih ki, baiki sakanka 155 ra marikan ba, Lâ Numba 406 wina, “Nicaragua Gabamintka Saurka Tara Paniska Lâka Daukanka Ulbanka Bapanka” bri ba, Pliska ra Wihta nani Kumi baman ba bara Pliska ra Panis Yabanka Wihtika nani bui tânka ba aisan kaka saurka nani uya tara apia ba dukiara.

Baku sin Makabanka daukan Upla Lâka Dadaukra Apiska nani ra Paniska yabi Watla nani Tânka Tara bri ba karnika bri banhwi kabia kakaira kaia Distrit ra Wihta nani Karnika ni Saura Munanka Lâka Tânka lankira nani bui lâ ulbi sakanka nani daukbia ba saurka nani uya tara apia bara yahpa nani daukan ba dukiara.

- e) Karnika bri kabia Lâka daukanka kum daukras ban swi ba kakaira takaia, baku sin Lâ Dadaukra Tara Daknika tilara Paniska Yabanka Watla Bîla ba, saurka tara nani daukan kakaira banhwi ba lâka mangkanka nani bara makaban taim wapnika mangkan ba Makabanka daukan Upla Lâka Dadaukra Apiska nani ra Paniska yabi Watla nani Tânka Tara bri ba bâk.

Baiki Sakanka 32. Bapanka lainka ra daukaia Karnika¹

Naha baiki sakanka ra wal auya sinska tânka nani ra, Distrit ra Lâ Watla nani Karnika ni Saura Munanka Tânka

¹ Ulbanka mistikka, “*La Gaceta*” ra ulban Numba 62 Kakamuk Kati 30, mani 2012.

lan pali banhwi ba, baha nani karnika brisa kakaira taki muni pas uplika nani lâ bui traipka yabi baku baha wapnika mangkaia, saurka daukanka nani naha Lâka ra tânka nani marikan ba, bara baha purkara, nahmuna saurka daukanka nani:

a) Ulbanka Putka I ra, Buk II ra, Lâ Numba 641 wina, “Saurka Tara Paniska baku Ulbanka Bapanka”, bara tânka kler pali naha Saptika nani ra ulban sa:

1. Sapta I, Rayaka mapara Saura Daukanka nani

Baiki Sakanka 142. Silp pruaia tânka ra brih waia o Hilpka.

2. Sapta II, Luhpa iki Sakanka, Baiki sakaia dukiara Mihta nani wal alki ba bara Kau Aisubi takras ra latwanka nani.

Baiki Sakanka 144. Adar âpu Luhpa iki Sakanka.

Baiki Sakanka 145. Tânkas lâka ra Luhpa iki Sakanka.

Baiki Sakanka 148. Pat aisubi takaia baila bibika ra Latwanka nani ba dukiara.

3. Sapta III, Latwkanka nani bara Upla nani Bin dauki aiklabanka.

Baiki Sakanka 156. Kaiki pali Siknis Upla ra luan ba.

b) Ulbanka Putka II ra, Buk II ra, Lâ Numba 641 wina, “Saurka Tara Paniska baku Ulbanka Bapanka”, bara tânka kler pali naha Saptika nani ra ulban sa:

1. Sapta II, Prika Lâka bara Wîna Aiska Brinka mapara Saura daukanka nani.

Baiki Sakanka 167. Taiban natka ra Saura Munanka.

Baiki Sakanka 168. Tuktan nani mani 14 alkras kan taiban natka ra saura munanka.

Baiki Sakanka 169. Taiban natka ra saura munanka kau wirha daukan ba.

Baiki Sakanka 170. Tuktan mairin kau tiara takras ra kunin muni alki saura munanka ba.

Baiki Sakanka 171. Tuktan mairin kau tiara takras ra kunin muni alki saura munanka kau wirha daukan ba.

Baiki Sakanka 172. Taiban natka ra alki saura munan ba.

Baiki Sakanka 173. Marit takaia sip apia lainka nani ra pamali nani wîna tara brinka dauki ba.

Baiki Sakanka 174. Wîna tara brinka dukiara ris yabras, nina kat ba.

Baiki Sakanka 175. Wîna brinka taibi munan dauki wina lalah saki ba, ulbanka o lilka tâskikira nani marikanka bara tiara aihwa apia nani wal wîna brinka daukaia lalah aibapi.

Baiki Sakanka 176. Saurka kum wina tânka kau tara aihwa taki ba wîna brinka taibi munan dauki wina lalah saki ba, lilka tâskikira nani marikanka bara tiara aihwa apia nani wal wîna brinka dauki lalah aibapi bâk.

Baiki Sakanka 177. Laik mita kuntri ra impakanka dauki ba dukiara Nikbanka bukanka wîna brinka taibi munan dauki wina lalah saki ba lukanka nani wal.

Baiki Sakanka 178. Lâ wina sait ra wîna brinka nani dauki warkka bukanka.

Baiki Sakanka 179. Lâ wina sait ra wîna brinka nani dauki warkka bukanka kau tara taki ba.

Baiki Sakanka 180. Kakirhbra mairin nani taya wina raya iwi waitnika warkka ba.

Baiki Sakanka 182. Upla nani wal bisnis dauki ba alba lâka, wîna brinka taibi munan dauki wina lalah saki ba o main kaiki baku brisa natka nani wal.

2. Saptâ III, Diara daukaia Pri Lâka brih diara daukaia ba mapara saura daukanka nani.

Baiki Sakanka 188. Kupia lâka âpu ban Kwihra mangkanka.

Baiki Sakanka 189. Kunin muni natka ra Kwihra mangkanka.

c) Ulbanka Putka V ra, Buk II ra, Lâ Numba 641 wina, “Saurka Tara Paniska baku Ulbanka Bapanka”, bara tânka kler pali naha Saptika nani ra ulban sa:

1. Sapta I, Upla kum Marit, Mayas o Piarka tânka ba mapara saura daukanka nani.

Baiki Sakanka 210. Lâ Natka kat Marit apia ba.

Baiki Sakanka 211. Marit Lâka brisa baku Marikanka Kuninkira.

Baiki Sakanka 212. Marit Takanka Lâ kat daukras ba.

2. Sapta III, Pamali baku blestu Wark nani daukaia bri ba kulkras tânka.

Baiki Sakanka 217. Plun nani blestu yabaia bri ba kulkras tânka.

3. Sapta IV, Yapti, Aisa bara Luhpa nani ai Tânka nani bri ba mapara saura daukanka nani, Pura Kaikanka bara Main Kaikanka.

Baiki Sakanka 218. Kau sirpi o diara daukaia sip apia saki briaia ba.

Baha nani sut ba daukan sa kaka mairin nani mapara, tuktan mairin nani, tuktan waitna nani o wahma/tiara aihwa apia nani mapara sin, sim baku upla almuk skahwa nani saurka daukan uplika wal ai tânka kum kra brisa kaka sim tâlia bri bahmuna baku, waitnika mairka wal pamali lainka ra ba, pura kaikanka tani ra banhwi ba, marit uplika nani, wal ban bri asla banhwi ba, wal bri kan kuna swin nani ba, asla baku wal bri banhwi ba, wal brisi swin nani ba, wal kut muni banhwi ba, wal kut taki si swi banhwan ba, wal pana pana latwan marikanka kum, apia kaka saurka daukan uplika ba upla bui kakaira apia sa.

Tawan kat Panis yabanka dukiara Lâ Watla nani ba bara Tawan kat Lâ Watla nani Kumi Baman ba lika sip banhwisa kakaira taki bara wapnika mangkaia uplika ba blikka waia o lâka daukanka kat, saura daukanka nani dukiara lâka nani dauki waia ba, baha dukiara sika ulbanka pîska luan ra aisi ba.

Baiki Sakanka 33. Warkka tâura uplika nani kau Sinska Pâwanka

Paniska yabaia dukiara Lâ Daukanka nani Aslika tilara banhwi ba sut, lâ karna briaia sa bara baku lika mairin mapara karnika ni saura munanka tânka pliki bara turbi

kaiki uplika nani sut ba, baha sinska lainka ra pain pali trin muni banhwan kabia pas tâura smalkanka programka nani bâk, baku sin ban ai tâura wih ki kau sinska tara yabi ba, baha lika aipaswanka baku yakan bara aipaswanka wala nani wal dauki brih wabia ba.

Baha daukaia dukiara, Upla dukiara Gabamint tilara wark tara dauki Daknika ba bri kabia lâ dauki pliska nani ra gabamint nina ra ai warkka pain pali dauki banhwi ba baha lainka ra bara Kuntri bilara Lâ nani Aiska laki kaiki Aipaswanka ba mita mangkbia Wihta Waitna o Wihta Mairin bara Layar Tara Waitna nani o Layar Tara Mairin nani, witin nani ba Karnika ni Saura Munanka tânka pain pali kakaira nani, Lâ Numba 501 ra dîa wi ba baku, “Lâ nani ba Skulka dimi tânkira dauki waia Lâka”, bara Lâ Daukanka Tara nani Upla nani dukiara Apiska Watla bîla bani ra bri kabia Layar Tara Waitna o Mairin kum, witinka ba ai warkka tânkira dauki lan kaia sa.

Paskan kabia Managua Tasbaya Baiki Sakanka Tara bilara Lâ Daukanka Tara nani Upla nani dukiara Apiska ba ra, Wahma/Tiara aihwa apia nani dukiara Karnika ni Saura Munanka bara Paniska Yabanka dukiara Paniska yabi Watla Tânka Tara bri ba, baha lika kakaira takbia makabanka daukbia taim, baha lika lâ ulbi sakanka nani dukiara mangkan ba Karnika ni saura munanka tânka ra Lânkira nani Distrit ra Lâ Watla nani bâra ba mita, baku sin Distri ra Paniska yabaia dukiara Lâ Watla nani bâra ba Wahma/Tiara Aihwa apia nani dukiara.

Kuntri bilara pîska wala nani ra pulitik tânka ra tasba baiki sakanka ra, naha Paniska yabi Watla tânka tara bri na bilara paskan kabia Upla nani Lâka dauki Karnika mita dîa pitka kat nitka bri ba bara sip ba tânka kat.

Atlantik Kust ra Klauna Lâka bri Tasbaya Baiki Sakanka nani ra lika, trai munbia tânka pain pali kakaira uplika nani Kuntri bilara Lâ nani aiska laki kaiki Aipaswanka mita mangkbia ba, wan tasbaya pîska wina banhwi kabia.

Sapta II

Dauki marikanka kum mita warkka kau tâura barih waras o diara kum alki briaia o baku daukan ba apia wi ba dukiara

Baiki Sakanka 34. Dauki marikanka kum mita warkka kau tâura barih waras o diara kum alki briaia o baku daukan ba apia wi ba dîa tâka nani mita aula ba

Dauki marikanka kum mita warkka kau tâura barih waras ba bara diara kum alki briaia o baku daukan ba apia wi yaba dîa tâka nani mita taki ba lâ dadaukra nani dukiara, witinka nani ai mihta ra bri ba mairin mapara karnika ni saura munanka tani ra panis yabaia lâka tânkira dauki ba, baku sin yabalka wapni daukanka nani bara pua nani mangki ba, baha nani kabia ba lika Lâ Numba

406 ra bapan ba, “Nicaragua Gabamintka Saurka Tara Paniska Lâka Daukanka Ulbanka Bapanka” bri ba.

Diara kum alki briaia o baku daukan ba apia wi ba o iskius munanka nani ba param aisan kabia taim adarka wal, Lâ Daukanka Tara nani Upla nani dukiara Apiska ba mita dukia tânka ba blîkbia Wihta waitna o Wihta mairin wala Sirka ra ba mihta ra, witinka na baha yabalka daukanka ba ban dauki wabia dukiara wapnika lâs alkbia ba kat.

Wihta waitna o Wihta mairin wala Sirka ra ba ai warkka kau tâura brih waras o diara kum âu takaia kan apia wi ba, lâka tânka ba blîkbia Lâ Daukanka Tara nani Upla nani dukiara Apiska ra, baha mita wapnika mangkbia dukia tânka ba Lâ Watla wala ra bliki, baha lika Mairin mapara karnika ni saura munanka lainka ra kau diara lan ba, baha sika Lâka Dadaukra Apiska snaya ra iwaika kau lamara bâra ba kat.

Warkka kau tâura brih waras o diara kum âu takaia kan apia wi ba upla lâka dadaukra apiska uplika pali kum sa kaka, baha lâka dadaukra apiska memberka wala nani mita wapnika mangkbia. Tilara uplika nani sut ba warkka kau tâura brih waras o diara kum âu takaia kan apia wi ba tilara kaka, baha bilara apis wala sim karnika bri ba bahmuna mita baha tânka kaikbia.

Baiki Sakanka 35. Diara kum alki briaia o baku daukan ba apia wiaia sanska

Diara kum âu takaia kan apia wi ba lâka dauki auya ba tila bâk dingkan kabia, ai bîla ni aisi o ulbanka bâk, baha lâka tâ bri ba Wihtika waitna o Wihta mairin mawanra, apia kaka Lâ Daukanka Tara nani Upla nani dukiara Apiska bilara Paniska yabi ba Apiska nani ra Layar Waitna Tara o Layar Mairin Tara mawanra o Lâ Dadaukra Tara Daknika mihta ra, bara tânka rait ba marikanka nani kasak ba yabi.

Baiki Sakanka 36. Diara kum alki briaia o baku daukan ba apia wiaia takan ba mita dîa trabilka nani briaia aula

Wihta waitna o wihta mairin ba baku daukan ba apia win ba, ai karnika ba tikras sa baku daukan ba apia o dauki marikanka mita warkka kau tâura briaia waras ba wapnika mangkbia ba kat.

Sapta III

Mairin bara Tuktan nani Trabilka pura kaiki Warkka tâura ba dukiara

Baiki Sakanka 37. Mairin bara Tuktan nani Trabilka pura kaiki Warkka tâura ba karna daukanka

Mairin bara Tuktan nani Trabilka pura kaiki Warkka tâura ba Dairiksanka ba, ai traipka lainka ra Nicaragua Puliska nani Lalka Tara Waitna o Mairin ba adarka munhtara sa. Nicaragua Puliska nani ai mihta ra bri ba Mairin bara Tuktan nani Trabilka pura kaiki Warkka tâura ba, baha nani bâra ba kuntri pîska baiki sakanka nani ra, distrit nani ra bara “municipio” nani bilara sin, baha nani ba ai warkka daukaia dukiara Mairin bara Tuktan nani Trabilka pura kaiki Warkka tâura ba Dairiksanka ba mina munhtara kabia.

Nicaragua Puliska nani Mairin bara Tuktan nani Trabilka pura kaiki Warkka tâura ba Dairiksanka ba lika diara lankira daknika kum sa bara ai warkka baku brisa panis briaia dukia nani taki ba tânka turbi kaikanka, kainara ridi takanka bara alki daukanka ba, baha nani dukiara sika naha Lâka ra tânka aisi ba. Nicaragua Puliska nani “Municipio” nani bilara ai Apiska nani bri Bâska waitna o mairin ba, panis yabaia dukiara lâka krika nani ba tânka turbi banhbia, baha munisiopioka nani ra Mairin bara Tuktan nani Trabilka pura kaiki Warkka tâura ba raya nani daukras ba bilka ra. Kainara warkka daukanka bara karnika ni saura munanka brin uplika nani ba hilpka tara kum yabaia ba, alki dauki banhbia Gabamint aipaswanka nani aikuki asla, daukanka ulbanka nani kulkanka aitani yaban ba kat alki dauki.

Nicaragua Puliska nani Mairin bara Tuktan nani Trabilka pura kaiki Warkka tâura ba Dairiksanka ba, baha sika

karnika bri aslika ba upla nani baha warkka tara ba tilara ani uplika dimaia ba, bâra takaskaia, plis wala ra lakaia bara mahka taki waia witin mita âu o apia wiaia. Sim natka ra, diara nani bara hilpka yabanka dukia nani nahki yus munaia ba adarka mangkbia, baha nani sika saura munan uplika nani ra hilpka aiska yabaia dukiara bri ba.

Gabamint bui blestu hilpka nani aitani kat yabaia sa Mairin tuktan wal trabilka kaiki Apiska ra, ai warkka pain daukbia bara sinska smalkanka pain bri banhbia dukiara mairin nani mapara karnika ni saura munanka ba lainka ra.

Mairin bara Tuktan nani Trabilka pura kaiki Warkka tâura ba Dairiksanka ba mita blestu dfa dfa nitka nani bri ba mihta ra mangkaia sa bara baku sin baha tilara wark taki uplika nani ba ai pliska ra kaia ba wik bilara yua bani ra 24 awar nani, bara yaka wark wala nani ra baha dingkaia apia.

Lâ dauki pua ra Tâ Baikanka tilara wark sâtka nani dauki ba, Tânka Taturbra nani, Sâpkira Tânka Plaplikra bara Tawan ra Upla nani Main Kaikanka baku Nicaragua Puliska nani bri ba, Mairin bara Tuktan nani Trabilka pura kaiki Warkka tâura ba mita tâ baiki muni kau kulkanka yabia mairin bara tuktan mapara karnika ni saura munanka saurka nani wal tânka bri ba kler munanka dukiara.

Mairin bara Tuktan nani Trabilka pura kaiki Warkka tâura ba ai bisniska aiska daukbia dukiara, Gabamint bui Nicaragua Puliska nani Lalah nahki prais tikaia ba tilara hilpka nani nit ba dingkbia.

**Baiki Sakanka 38. Mairin mapara Karnika ni Saura
Munanka daukan nani mapara aiklabi Daknika
Lankira ba Karna Daukanka**

Upla dukiara Gabamint tilara Wark Tara dauki Daknika ba, upla nani bara upla lâka dauki ba tilara tâwan aisasara baku aimaki ba, paniska yabanka ba dukiara nina kat kabia mairin ra kulkanka yabaia lukanka wal. Naha alkaia dukiara, Mairin ra Karnika ni Saura Munanka mapara Saurka Tara nani tânka kau lankira nani Daknika ba, baha lika Gabamint bilara bara baha nina kat ai Warkka dauki ba karnika munhtara ba, baha daknika mihta ra kabia naha Lâka ra saurka nani nina mâkan bara paniska nani yaban ba tânka turbi kaikanka bara nina kat kaia warkka ba.

Naha Tânka kau Lankira Daknika na kuntri aiska bilara ai warkka dauki ba, ai bapanka nani bara dîa warkka nani daukaia bri ba kulkaia dukiara, Upla dukiara Gabamint tilara wark tara dauki Daknika kuntri baiki sakanka tasbaya nani ra, klauna tasbaya nani bara “municipio” bilara tawanka nani ra putka nani bri ba ra yabia sinska tânka bara lâ hilpka nani, yula kahbanka bara warkka pura kaikanka sin, bara kau diara lan

uplika nani bri kabia, an pali kuntri baiki sakanka tasbaya, klauna tasbaya nani bara “municipio” bilara nit kabia ba kat.

Naha Lâka ra saurka tara nani dukiara mangkan ba kainara ridi takanka, hilpka yabanka, kaina kahbanka, tânka turbi kaikanka bara paniska yabanka ba warkka nani dukiara, Mairin ra Karnika ni Saura Munanka mapara Saurka Tara nani tânka kau lankira nani Daknika ba, baha lika Upla dukiara Gabamint tilara wark tara dauki Daknika karnika munhtara ba, bahmuna warkka tânka kaiki aipaswanka nani aikuki asla daukaia lukanka nani ba daukia.

Tânka kau Lankira nani Daknika ba ai warkka aiska ba pain daukia dukiara, Gabamint bui lalahka nani nit ba yabia, baha lika Upla dukiara Gabamint tilara Wark Tara dauki Daknika Lalah nahki tikaia tânka bri ba wina.

ULBANKA PUTKA VI

NAHA LÂKA RA PURA KAICI SAURKA NANI PURARA PANIS YABAIA LÂKA WARKKA NAHKI DAUKI BA DUKIARA

Sapta I

Nahki dauki waia tânka ba dukiara

Baiki Sakanka 39. Nahki dauki waia tânka ba

Naha Lâka ra saurka tara nani lâka daukanka dukiara bapan ba, ai lâka daukbia bapanka nani, lâ dadaukra daknika nani wal bara nahki natka ra bapan ba Lâ Numba 406 ra, “Nicaragua Gabamintka Saurka Tara Paniska Lâka daukanka Ulbanka Bapanka” ra natka nani an pua nani mangkan ba tânka kat saura daukanka tara nani bara uya tara apia nani ba dukiara, nahki yabaia pitka ba kat, sakuna nu kaia pua kumi ra sin naha Lâka ra bapanka nani mangkan ba mapara kaia apia sa.

Baiki Sakanka 40. Paniska yabaia daukanka nahki ai warkka dauki ba

Upla dukiara Gabamint tilara Wark Tara dauki Daknika ba naha Lâka ra saurka nani marikan na sut purara paniska yabanka daukan ba warkka daukaia sa. Saura munan uplika ba sip kabia silp dusa kuhbanka ba daukaia baiki sakanka 78 ra dña lâka ba tânka kat, baha lika Lâ Numba 406 wina, “Nicaragua Gabamintka Saurka Tara Paniska Lâka daukanka Ulbanka Bapanka” ra bara baiki sakanka 564 ra, Lâ Numba 641 wina, “Saurka Tara Paniska baku Ulbanka Bapanka”. Naha lâs tânka ra lika, Upla dukiara Gabamint tilara Wark Tara dauki Daknika ba dukia ba alkaia dukiara tâ baikaia sa saura munan uplika ra lâka dauki auya pîska nani ba sut ra.

Baiki Sakanka 41. Pât tilara uplika ai manka mayara bri ba

Saura munan uplika ba ai manka kau mayara brisa o ai wîna ba skahwa sa kaka, dukia nani takan ba dusa kuhban kaia sip sa ai layarka nani bri ba mita, baku sin saura munan uplika o asla takanka nani upla ra hilpka yabi ba, upla ra tâ baiki ba bara smalkanka nani yabi ba o ani uplika dukia nani takan ba pain kakaira sa kaka.

Baiki Sakanka 42. Lâka dauki auya piua ra saura munan uplika nani ra yula kahbanka

Lâka daukia piua nani ra ai mawan sâkbia taim, saura munan uplika ba sip sa yaka nahmuna uplika nani yula kahbaia: wan sinska tânka kaiki daktarka waitna o mairin, wan sinska pain apia daktarka o upla wala kum kra, kan sip sa witin ai lukanka ra ai srinhka baku ba mita diara saura kum takbia kaka, baha nani mita hilpka yabia.

Baiki Sakanka 43. Lâka tânka nani taki ba kaina kahbanka bara kakaira sakaia limitka nani ba dukiara

Naha Lâka ra daukanka nani bara daukanka natka nani wal tânka bri ba ra, saura munan uplika nani witinka nani ya pali ba tânka kaina kahban kabia, baha lika witinka pali ya ba tânka nani tani ra, ai kiamka nani sakan ba

bara ani uplika wala witin bui main kaiki bri ba sin. Sturi sasakra natka nani ba wîna brinka saurka nani munan uplika nani witin nani ya pali ba kaina kahbaia dukiara bara baku sin tânka wala nani mita kli alki saura munaia sip ba mapa ra, ai warkka dauki banhwaia sa sturi pliki sasakra sinskira baku lukanka brih ki.

Baiki Sakanka 44. Saurka daukan marikanka tasba baiki sakanka ra daukan tânka tâura dauki ba

Lâ dauki pliska ra gabamint nina ra ai warkka dauki ba o layar snaya wina dusa kakuhbra baku ba, sip kabia makabaia wîna kat tânka marikanka ba pas tâura daukaia, baha lika naha Lâka ra saurka daukanka nani marikan ba, naku kabia taim:

- a) Saura munan uplika ba o witniska takuya ba trabil ra kauhaia sip kabia taibi munanka nani briaia nahmuna baku ra: karnika ni saura munanka, sirang iki saura munaia lukanka, lalah yabaia pramiska o bahmuna hilpka yamnika wala nani;
- b) Sturi aisanka bara upla sut mawanra lâka daukanka ba yu wala daukaia, baha kat swisa o kau dauki waia apia tânka nani tâka mita, baku sin saura munan uplika ba sip apia munbia kaka lâ mawanra waia o lâ dauki pliska ra iwaika ra sip wihka iwras kli lâka ba daukaia dukiara paiwanka wala daukbia ba ra waia dukiara, saura munan uplika watla ba

lâka dauki pliska ba wina laihura sa kaka, impakaia dukia nani uya âpu kaka, baha nani ba ailal âpu tâka mita, bara lalah aitani âpu mita pliska ba ra takaskaia bara plun piaia dukiara.

Naha lâka bapanka na blestu daukan kaia sa daukaia natka bapan ba kat kulkanka yabi, baha sika baiki sakanka 202 ra, Lâ Numba 406 wina, “Nicaragua Gabamintka Saurka Tara Paniska Lâka daukanka Ulbanka Bapanka” ra bara sim baiki sakanka ra lâ nani bapan ba ra saurka kumi sin munras.

Baiki Sakanka 45. Wîna tara pain laki kaikanka

Sim minitka ra daukan kaia sa wîna tara tânka laki kaikanka ba bara wîna tara wina sin rayaka bri laya nani kaiki ba upla rayaka mapara saura daukanka nani ra bara saura munan uplika ai prika lâka bri ba tani ra wîna brinka tânka nani ba dukiara, ani tânka nani ra nitka bâra kaka daukaia daukanka ba tânka kum pliki sakaia dukiara baman, baha lika saun muni bara praki kaikaia sip ba tânka turbi kaiki uplika rayaka yabi laya nani wal praki kaiki. Baha tânka turbi kaikanka adarka ba lika adar yaban kaia sa lâ uplika ba mita, pitka kat lukanka nani ra kulkanka yabi, sakuna aman pali kaikaia sa tânka turbi kaikan uplika wîna tara yamnika ba trabil ra dingkaia apia bara nit kabia taim saurka daukan uplika baku kulki ba tânka pain kaikaia dukiara.

Baiki Sakanka 46. Tilak dimi tâwan hilpka aisanka daukaia adar âpu ba

Tilak dimi tâwan hilpka aisanka ba naha Lâka ra nina mâkan na tilara sip daukan kabia apia.

Baiki Sakanka 47. Upla baku warkka alki daukaia raitka

Naha Lâka ra mangkan saurka nani mita ani uplika ra kauhi ba, paniska laki kaiki pliska ra upla natka ra daukanka ba daukaia wilin takbia ba Lâ Numba 406 ra bapan ba tânka kat, “Nicaragua Gabamintka Saurka Tara Paniska Lâka daukanka Ulbanka Bapanka” ra, dairik daukaia sip kabia, silp layar aibapanka bâk o Upla dukiara Gabamint tilara wark tara dauki daknika ra makabaia sinska tânka yabia o witin nina ra lâ mawanra bubia ai raitka dakban ba kli yabia warkka dukiara, baku sin saurka daukan ba mana wapni daukanka bara sauhkanka nani daukan ba mana aibapaia.

Sapta II

Pulis ai warkka nani daukaia ba bara paniska alki daukanka ba dukiara

Baiki Sakanka 48. Pulis nani riputka

Mairin bara Tuktan nani Trabilka pura kaiki Warkka tâura nani ba Kuntri baiki sakanka tara Pliska, Distrit

o “Município” lainka ra ba mita upla kum daukanka dfa pali ba ulbanka tanka plikan ba paski banhbia, baha nani lika sain munan kabia Mairin bara Tuktan nani Trabilka pura kaiki Warkka taura ba Baska Mairin mita, baha ningkara lalka nani ra blikaia dukiara. “Município” nani kum kum ra “Comisaría” nani maki ba apu sa kaka, riputka ba Pulis nani Baska mita sain munan kabia.

Baiki Sakanka 49. Alki silak ra mangkaia adarka

Mairin bara Tuktan nani Trabilka pura kaiki Warkka taura ba Baska Mairin nani ba, apia kaka ai warkka tanka ra, Pulis nani Baska ba, silp ai wina kat baha dauki, sip banhwi kabia uplika alkaia adarka lakaia, dfa pali tanka nani nit mita baha dauki ba mita marikanka wal, ani uplika nani mapara saurka kum daukan ba dukiara witnis tanka rait brisa kaka, baha lika naha Laka ra saurka ra aitani kulkras ba tanka kat bara pri laka briras ba, saurka daukan ba ningkara awar nani 12 bilka ra. Ban sakuna, naha dukia nani takan na kulkanka yabia apia saura dadaukra kum ra naha pua ra bara istikira nina bliki baku, witin dimi watla ba paun wina dimaia dukiara.

Tanka wala nani ba ra lika, nit pali kabia la wina adarka yabanka kum, witinka ba alkaia dukiara. Upla kum ba mahka alkuya taim, pulis warkka dauki nani ba mita maisa pakaia sa kau awar nani 12 luras kabia taim, Upla dukiara Gabamint tilara wark tara dauki Daknika ra,

warkka nani daukan ba dukiara, bara dusa kuhban uplika ba marikaia lâ bui mangkan piua ba bilka ra, baha lâka daukaia ba wihtika ra.

Baiki Sakanka 50. Paniska kahban ba alki daukanka

Ani uplika nani karnika ni saura munanka saurka nani mairin nani, tuktan mairin nani, tuktan waitna nani bara tiara aihwa apia nani mapara daukan kaka pâtkira nani baku takbia kaka, blestu pali dimi banhwaia sa tâ brinka, hilpka yabanka bara kainara ridi takanka programka nani tilara, baha nani lika dauki ba ai dauki marikanka saurakira nani ba sât wala daukaia dukiara bara yaka kli baha dauki banhwaia apia. Paniska yabanka lâka mita marikbia dfa sâtka bara piua ba ani kat kabia sapa, paniska kahban ba limitka nani ba kat. Kuntri bilara silak watla ra mangkan uplika nani panis yabaia bara wapnika mangkaia pliska natka ba bri kaia sa diara pain nani, bara baku lika naha Lâka ra hilpka yabanka bara tâ briaika dukiara program nani ba yaka pâwbia dukiara.

ULBANKA PUTKA VII

**KAINARA RIDI TAKANKA, HILPKA YABANKA
BARA MAIRIN RA KAINA KAHBANKA PULITIKKA
NANI**

Sapta I

**Kainara ridi takanka, hilpka yabanka bara mairin ra
kaina kahbanka tânka nani daukaia dukiara natka
nani ba dukiara**

**Baiki Sakanka 51. Nicaragua bilara Gabamint
Warkka tâura Bakahnu diara daukaia Kamisanka
Mairin ra karnika ni Saura Munanka ba mapara
aiklabaia dukiara**

Paskan kabia Nicaragua bilara Gabamint Warkka tâura Bakahnu diara daukaia Kamisanka Mairin ra karnika ni Saura Munanka ba mapara aiklabaia dukiara ba, baha tilara diman kabia naha Gabamint Aipawanka tâ brabrira nani: Lâ Dadaukra Tara Daknika, Nicaragua Lâka Dadaukra nani Aslika Mairin, Wahma/Tiara nani, Tuktan nani bara Pamali Bisniska nani Kamisanka bri ba, Mairin nani dukiara pura kaikaia Karnika bri Uplika Kulkanka Tara bri ba Upla Raitka nani Tâwan Aisanka ba dukiara, Nicaragua Puliska nani Mairin bara Tuktan nani Trabilka pura kaiki Warkka tâura ba Dairiksanka, Lâ Daukanka ra Hilp Munanka Tâ Briatika dukiara Pulis nani mihta ra ba, Upla dukiara Gabamint tilara Wark Tara dauki Daknika, Upla nani Tâwan Aisasara, Upla pruan Wîna Tara saun muni Tânka kler saki Pliska, Skul ra Smalkanka Ministerioka, Wan Wîna Tara Yamnika Ministerioka, Pamali, Wahma/Tiara bara Tuktan nani Ministerioka, Wark Tânka kaiki Ministerioka, Nicaragua

bilara Mairin nani Tâнка pura kaiki Aipaswanka, bara Kuntri bilara Silak Watla ra mangkan uplika nani panis yabaia bara wapnika mangkaia pliska Natka.

Kamisan ba mani bani ai lalka nani wahbi sâkbia ai tila wina: tâ brabrira waitna o mairin kum bara âiulbra waitna o mairin kum, bara kati yumhpa bani asla takbia natka isi ra bara nit piua dukia lika baku ai dara wali banhbia kaka.

Baku aitani sa lukbia kaka, kamisan ba sip kabia ai mitinka nani ra paiwaia, sakuna aisanka wal baman, bot munaia lika apia, upla nani aslika aipaswanka nani uplika nani ra, apia kaka gabamint wal o silp wark dauki banhwi ba mairin ra karnika ni saura munanka lâka tâwan aisanka ra.

Tasba baiki sakanka tara bara “municipio” nani bilara Gabamint ra wark asla dauki natka ra kamisan nani paskan kabia bara dakni tara lalka nani pat Nicaragua bilara Gabamint Warkka tâura Bakahnu diara daukaia Kamisanka Mairin ra karnika ni Saura Munanka ba mapara aiklabaia dukiara ba aikuki ai maisa wilkbia bara “municipio” nani ra “alcaldía” nani aikuki sin. Naha kamisanka nani na wahbi sâkbia ai tila wina: tâ brabrira kum bara âiulbra sin kum, kati bilara aima kum asla taki banhbia bara nit piua dukiara lika baku aitani sa luki banhbia taim.

Baiki Sakanka 52. Nicaragua bilara Gabamint Warkka tâura Bakahnu diara daukaia Kamisanka Mairin ra karnika ni Saura Munanka Lâka ba mapara aiklabaia dukiara ai Warkka nani bri ba

1. Aikuki Asla Warkka dukiara:
 - a) Natka nani nikbanka dauki muni alki briaia lalah dingki banhbia dukiara nahmuna programka nani lainka ra: mairin mapara karnika ni saura munanka dukiara kainara ridi takanka, hilpka yabanka bara panis munanka ba, baha lika gabamint aipaswanka nani lalah dîa pitka kat tikaia ba daukanka ra;
 - b) Yabal plikaia Gabamint bui lalah kahbi brinka pain kum paskaia dukiara, karnika ni saura munanka mairka nani ra saurka takan ba pain daukaia dukiara, upla raitka nani kli yaka pain takaia bara kli yabia warkka nani ra;
 - c) Gabamint tani ra wark sâtka nani yaka takaia, tâ briaia, tatukbaia bara alki daukaia, mairin mapara karnika ni saura munanka tilara aitwahkanka pulitikka natka nani alki daukaia dukiara.
3. Warkka pura kaikanka bara laki kaikanka ba dukiara:
 - a) Mairin ra karnika ni saura munanka pura kaikaika ba paskaia, baha lika Mairin ra Karnika ni Saura

Munanka mapara Kuntri bilara aiklabi Kamisanka ba mihta ra kabia, baha mihta ra kabia riputka nani paski muni sinska lâka nani, laki kaikanka, gabamint daknika nani aikuki asla wark takanka bara paskaia ba dukiara, baku sin mairin nani ra karnika ni saura munanka tânka dukiara daukanka tânka pliki kaikanka bara lukanka kahbanka nani baku, “municipio” bilara aipaswanka nani bara mairin asla takanka nani sut tilara dingki brih ki;

- b) Diara taki sturka numbika riputka natka ba daukaia, mairin mapara karnika ni saura munanka saurka nahki ba ninara kaia bara nahki auya ba nina blikaia dukiara;
- c) Natka wala nani snaya ra dingkaia sip ba bahmuna kahbaia, baha nani nit kabia ba mairin mapara karnika ni saura munanka natka pain daukaia nahmuna natka ra: kainara ridi takanka, hilpka yabanka, tânka turbi kaikanka, alki daukanka, panis yabanka, kli sins yabanka, pura kaikanka bara danh âpu daukaia dukiara.

Baiki Sakanka 53. Gabamint wina balras aipaswanka nani tilara dimanka

Kamisan ba asla takbia kati 6 bilka ra mas aima kum pan, mairin nani mapara karnika ni saura munanka sinska nani ra asla takanka ai warkka dauki banhwi

ba aikuki, sinska nani, lukanka nani o dfa dukia nani daukaia pain sa wibia ba walaia dukiara, ai warkka ba kau karna daukaia dukiara.

Kamisan ba mita asla takanka nani ra sturi nani yabaia sa ai “planka” nani bri ba dukiara, mairin nani mapara karnika ni saura munanka ba dukiara aiklabanka pulitikka nani bukaia mata, baku sin pura kaikanka bara laki kaikanka wina numba saki riputka nani ba dukiara.

Sapta II

Paskanka bara bapanka ba dukiara

Baiki Sakanka 54. Pulitikka Paskanka ba dukiara

Gabamint tila wina daknika kamisanka ba, blestu pua kum mangkaia sa baha lika yu nani 180 bilka ra naha Laka na ai karnika mahka bribia ba ningkara, baha sika mairin nani mapara karnika ni saura munanka dauki ba dukiara kainara ridi takanka, hilpka yabanka bara kaina kahbanka pulitikka.

Baiki Sakanka 55. Bapanka

Naha pulitikka bapanka na sika ani mairka nani mapara karnika ni saura munanka dauki ba dukiara natka nani bapaia kainara ridi takaia, hilpka yabaia, kaina kahbaia, ta briaia, sinska yabaia bara nina kat kaia dukiara.

Sapta III

Wihta mairin o Wihta waitna sinska tânka ba kat wark dauki ba bara raitka tikanka pua mangkan ba kulkanka paniska yabaia daukanka ba alki daukanka dukiara

Baiki Sakanka 56. Wihta mairin o Wihta waitna sinska tânka ba kat wark dauki ba

Baha ba daukan kabia Wihta mairin o Wihta waitna sinska tânka ba kat wark dauki ba wal, naha Lâka ra saurka nani dukiara aisi ba kat.

Baiki Sakanka 57. Pua mangkan ba kulkanka

Mairin nani mapara saura munanka saurka nani daukan ba tâwan pua kat paniska yabanka ba daukras sa kaka, paniska yabaia daukanka raitka tikanka pua ba tâ krikbia sim watla ra dimi ba, marit natka ra wal ba, kut munanka o dâ dâ bahmuna mairka wihki saurka dadaukra wal dauki ba swibia taim.

ULBANKA PUTKA VIII

**LÂ NUMBA 641 RA SÂT WALA DAUKANKA NANI,
“SAURKA TARA PANISKA BAKU ULBANKA
BAPANKA”**

Sapta Kumi Baman

Lâ Numba 641 ra pura prakanka nani bara sât wala daukanka nani dukiara, “Saurka Tara Paniska baku Ulbanka Bapanka”

Baiki Sakanka 58. Naha baiki sakanka nani ra pura prakanka nani: 150,151, 152,169, 175 bara 195 Buk Sekan ra Lâ Numba 641 wina, “Saurka Tara Paniska baku Ulbanka Bapanka”, “La Gaceta” ra ulbi sakan, Gabamint Ulbanka Numba 83,84, 85, 86 bara 87, Mani 2008 bilka ra Lih Mairin Kati yua nani 5, 6, 7, 8 bara 9 ra daukan ba.

- a) Pura prakan kabia baiki sakanka 150 ra Lâ Numba 641 wina, “Saurka Tara Paniska baku Ulbanka Bapanka” ulbanka pîska klaki wala tâ krikanka sekan kum, baha ra dingkbia taim, naku aisi kaikan kabia:

Baiki Sakanka 150. Latwan yabanka nani

Naha Lâka Bapanka daukanka nani dukiara, latwan yabanka bîla tânka nani ba sika insauhkanka nani, wîna tara bilara latwan nani brin ba, wînka taya kalwanka nani, kriwanka nani, snukwanka nani, wîna ra amanka nani brin ba bara upla nani wîna tara o sinska yamnika ra trabil muni pâtka nani ba sut, baha sut ba lata tani tânka wina bal takan sa kaka.

Baha tilara sa sinska ra trabil saura nani sirpi o tara taki ba, sinska bîla yamnika ra trabil munanka silp wan wîna ra kulkanka yabi ba mayara iwan o upla baku wan pâwanka bri ba ra trabil nani yabisa kaka, baku sin wan sinska ra dîa dîa trabilka yaban ba o wan wîna tara pîska wala nani diara daukaia karnika bri ba tiwi ba bara trabil yabi ba upla baku natka ra, wark ra, skul ra, pamali o upla nani tilara, baku sin sinska biara ra dîa dîa sikniska taki ba, diara daukan o daukras ba tâka mita.”

- b) Baiki sakanka 151 ra Lâ Numba 641 wina, “Saurka Tara Paniska baku Ulbanka Bapanka” ra pura prakan kabia ulbanka pîska klaki muni wala tâ krikanka yumhpika kum, baha ba dingkbia taim naku aisi kaikan kabia:

Baiki Sakanka 151. Latwan yabanka sirpi nani

Ani uplika mita wala ra ai wîna tara ra o sinska ra latwan kum yabia ba bara baha tâka mita pas tâura saun muni rakbia ba purkara, daktar bui sin laki kaikaia sa kaka, paniska bribia ba lika silak watla ra kaia kati 6 wina mani kum kat.

Latwan yabanka ba, baha purkara nit sa kaka witin ra aparit kum daukbia, paniska bribia ba lika silak watla ra kati 6 wina mani wâl kat bâra kaia.

Sinska ra latwan sirpi yaban baku kulkisa, baha nani bui sinska pîska o biara ra trabil muni ba, bara baha tâka mita sinska daktarka bui laki kaikbia nit ba, paniska bribia ba lika silak watla ra kaia kati 6 wina mani kum kat.”

- c) Baiki sakanka 152 ra Lâ Numba 641 wina, “Saurka Tara Paniska baku Ulbanka Bapanka” ra pura prakan kabia ulbanka pîska klaki muni wala tâ krian walhwal-ka kum, baha ba dingkbia taim naku aisi kaikan kabia:

Baiki Sakanka 152. Latwan yabanka tara nani

Latwanka yabanka ba mita wîna yamnika o wîna tara aiska ba, sinska pîska kum ra trabilka, wîna pîska ahwa, wîna pîska o ai warkka dauki ba sut mayara ikan sa kaka, bara uplika rayaka ba trabil ra dingkan o ai rayaka aiska ra upla kaiki markka kum mawan ra swin kaka, paniska bribia ba lika silak watla ra kaia mani wâl wina matsip kat.

Latwanka yabanka ba mita wîna tara pîska wala ra tiwras markka kum kaikaia sip ba yaban takisa kaka, ani uplika ra ai warkka sâtka taki ba, waitna o mairin, dîa dukia dauki o ai natka bri ba baha pîska ba param bri kaia, paniska bribia ba lika silak watla ra kaia mani kum wina yumhpa kat.

Latwan yabanka tara ba takbia kaka “arma” nani yus muni, tuls nani bahmuna, diara nani, natka nani, diara

daukaia sinska nani o natka wala nani trabil tara bri balaia sip nani ba wan wîna tara ra, latwanka brin uplika wîna tara o sinska yamnika ra, paniska bribia ba lika silak watla ra kaia mani yumhpa wina 6 kat.

Sinska ra latwan tara yaban baku kulkisa, baha nani bui sinska pîska o biara ra trabil muni ba, bara baha tâka mita sinska daktarka bui laki kaikbia nit ba, paniska bribia ba lika silak watla ra kaia mani wâl wina matsip kat.”

- d) Baiki sakanka 169 ra Lâ Numba 641 wina, “Saurka Tara Paniska baku Ulbanka Bapanka” ra pura prakan kabia ulbanka “e” kum, baha ba dingkbia taim, naku aisi kaikan kabia:

Baiki Sakanka 169. Taiban natka ra saura munanka kau wirha daukan ba

Silak watla ra mani 12 wina 15 kat paniska kahban kabia, naku takbia kaka:

- a) Waitnika ba saurka ba daukbia witin ba kau karnika brisa ai dara wali, kulkanka tara brisa, wal ai pamalika sa, witin bui saura munan uplika ra hilpka yabisa o witin ra pain kaikisa, apia kaka mairka ba wal piua bani sim watla ra dimisa;
- b) Taiban natka ra saura munanka ba daukan sa kaka upla nani wâl o kau pura aikuki;

- c) Saura munan uplika ba ai wîna tara mapa ra ai karnika uya âpu kaka witinka ba sikniskira o wîna tara o sinska tani ra sip apia sa kaka bapi buaia, apia kaka mairin kwihra kum sa o ai manka ba mani 65 wina kau pura brisa kaka;
- d) Saura munan uplika ra wîna tara yamnika ra trabil saura kum brih aula kaka; o
- e) Saura munan uplika ba taiban natka ra saura munan tâka mita kwihra takuya kaka.

Naha baiki sakanka ra tânka nani ulban na bahmuna wâl o kau pura takbia kaka, paniska kau tara ba ai purara kahban kabia.”

- e) Baiki sakanka 175 ra Lâ Numba 641 wina, “Saurka Tara Paniska baku Ulbanka Bapanka” ra pura prakan kabia ulbanka pîska klaki muni wala tâ krikkan matsipka kum, baha ba dingkbia taim naku aisi kaikan kabia:

Baiki Sakanka 175. Wîna brinka taibi munan dauki wina lalah saki ba, ulbanka o lilka tâskikira nani marikanka bara tiara aihwa apia nani wal wîna brinka daukaia lalah aibapi

Ani uplika mita maisa kapbia, yabalka daukbia, nikbanka daukbia o yus munbia kaka wîna brinka nani o lilka bara ukbanka tâskikira nani mariki tuktan nani

kau mani 16 alkras nani o wîna skahwa nani ra, baha ba munan kaiki o upla sut mawanra o ai mânka yakan kaikbia taim tilara kaia, saura munan uplika ba âu takbia sin baha marikanka ba kaikaia o tilara dimaia, paniska bribia ba lika silak watla ra kaia mani matsip wina 7 kat, bara silak watla ra kaia mani walhwal wina 6 kat kahbia, saura munan uplika ba mani 16 brisa kaka bara mani 18 wina mayara brisa kaka.

Ani uplika nikbanka daukbia, lalah dingkbia, paskbia, ailal sâkbia, publik munbia, atki taukbia, plis wala wina bri balbia, plis wala ra blîkbia, kakaira sâkbia bara ulbanka sâtka nani yui taukbia kaka wîna brinka taibi munan dauki wina lalah saki ba lukanka nani wal, natka sât sât bâk dairik kaia want, masin natka ra, “digital” wi ba ra, wan kiama wali an wan nakra kaiki, apia kaka sturi laki bapanka wal, “electrónico” mâki ba o sâtka wala ra, ani uplika kau mani 18 alkras lilka o bîla baikra ba, wîna brinka o daukanka tâskikira bahmuna ra, rait aihwa o wiria kunin dauki baku, tânka nani kler pali mariki bara baha dukiara aisaras kuna pat tânka bri ba, apia kaka ai wîna pîska nani marikanka ba wîna brinka lukanka nani wal, paniska bribia ba lika silak watla ra kaia mani matsip wina 7 kat, bara lalah aibapaia ba lika yu nani 150 wina 500 kat.

Ani uplika wîna brinka taibi munan dauki wina lalah saki ba lukanka nani wal, wîna brinka o lilka tâskikira nani mariki ba bahmuna brisa kaka ulbanka luan ra mangkan ba tânka kat, paniska bribia ba lika silak watla ra kaia mani kum wina wâl kat.

Ani uplika wîna brinka daukbia kaka o ban kra daukanka tâskikira bahmuna upla kum mani 14 bri ba bara mani 18 wina ai mayara ba wal, mairin o waitna kabia sin, mana aibapi o aibapaia pramis muni o baha dukiara lalah o hilpka wala nani bahmuna, paniska bribia ba lika silak watla ra kaia mani matsip wina 7 kat.

Naha Lâka Bapanka ra bara lâ nani tânka tara bri ba ra dîa lâka nani bapan lukanka nani ra, wîna brinka taibi munan dauki wina lalah saki tânka bribia ba sika wark sât sât dauki ba an baha ra yus munisa upla kum wîna tara ba bara ai manka bri ba lika mani 18 wina ai mayara o diara sip daukras ba, witin ai kupia lâka wal kabia sin, win takanka o lalah sakaia dukiara wîna brinka tânka ra, marikanka tâskikira, lalah win taki, bisnis dauki, upla sut kaikaia sip ba, kakaira sakanka o sâtka wala nani bahmuna.”

- f) Baiki sakanka 195 ra Lâ Numba 641 wina, “Saurka Tara Paniska baku Ulbanka Bapanka” ra pura prakan kabia ulbanka pîska klaki muni wala tâ krikan sekan kum, baha ba dingkbia taim naku aisi kaikan kabia:

Baiki Sakanka 195. Diara yukuwan ra ba kakaira sakanka

Ani uplika lâ tânka kat ai mihta ra sturi sakanka kum, ulbanka nani o upla walaiia apia bîla baikra nani alkan bahmuna brisa kaka, bara baha nani ba adar âpu upla sut mawanra kakaira sakuya kaka, witin ra baha nani blikan kabia sin, ai paniska bribia ba lika lalah aibapaia yu 60 wina yu 180 kat.

Masin ra kârma alkan nani ba, baku sin lilka nani, sturi lakanka nani o wauhtaya nani upla sut mawanra kakaira sakuya kaka, baha nani ba wîna brinka o lilka tâskikira nani bahmuna sa kaka, baha nani ba kupia lâka wal baha nani brin kabia sin, paniska bribia ba lika silak watla ra mani walhwal kaia. “Internet” bui kakaira sakan ulbanka nani sa kaka, ani wihtika karnika bri ba Upla dukiara Gabamint tilara wark tara dauki Daknika ba makabia taim, apia kaka ani uplika paniska yabanka alki dauki ba, adar yabia baha minitka ra sturka nani kakaira sakan ba mahka sâkbia.”

Baiki Sakanka 59. Baiki sakanka nani 23,78, 153,155, 162,182 bara 183 ra sât wala daukanka nani, baha lika Lâ Numba 641 wina, “Saurka Tara Paniska baku Ulbanka Bapanka”.

- a) Baiki sakanka 23 ra Lâ Numba 641 wina ba sât wala daukuya, “Saurka Tara Paniska baku Ulbanka Bapanka”, baha lika naku aisi kaikan kabia:

Baiki Sakanka 23. Sait ra laki swi ba bara kamisan dauki ba sait ra laki swi ba mita

Saura daukanka nani o saurka nani ba daukan kaia sip sa rait dauki o daukras tâka mita. Baha nani diara kum takan dukiara aisi banhwi ba, tânka briaia sip kabia rait daukras baku baha daukaia apia lukbia taim saurka dauki uplika bui lâ bui dîa daukaia win ba daukras kabia taim, bara baha dukia wal praki kaikaia ba lika, Lâ tânka karnika bri ba natka kat, dîa daukaia takaia ba yaka rait kaia. Ani dukia nani daukras kabia ba ra, saurka dadaukra ba lâ tânka kasak kum mapara krikan kabia sin, saurka daukanka rait ba dîa takan ba wal kumi takras kaka, paniska sirpi kum purara kahbia, taimka kau yari ba lika saurka daukan wina dîa taki ba limitka kau sirpi ba kabia bara baha limitka ba lika naha wina praiska bakriki kabia ba.”

- b) Baiki sakanka 78 ra Lâ Numba 641 wina ba sât wala daukuya, “Saurka Tara Paniska baku Ulbanka Bapanka”, baha lika naku aisi kaikan kabia:

Baiki Sakanka 78 Paniska kahbanka nani alki daukaia dukiara lâka nani

Wihta waitna nani, Wihta mairin nani bara upla lâka dadaukra nani ba mita paniska ba kahbia, lâ bui saura daukanka o saurka baku kulki ba pua kau yari wihki kau kunhku ba bilka ra, naha lâka sirpi nani na tânka brih ki:

- a) Saurka wina tânka nani kau tara bara kau sirpi taki trabilka nani takras kaka o kum kum bara wala nani takbia pua ra, dara walanka bri kabia saurka dadaukra ai wîna kat dîa tânka nani bri ba, bara baku sin saurka daukan ba dîa pitka kat tara o sirpi ba.
- b) Saurka ba wina tânka kau tara nani bâra sa kaka, bakriki prais paniska ba purara kahbia ai limitka kau pura ba kat, sakuna uplika ai wîna kat dîa tânka nani bri ba mita baku daukbia apia wibia kaka lika apia.
- c) Saurka daukan kuna paniska mayara iwi ba kumi o ailal takuya kaka, paniska kahbia ba lika bakriki wina mayara kabia.

- d) Saurka daukan kuna paniska mayara iwanka kumi o ailal kulkanka pain nani bri bahmuna takuya kaka, baha tânka briaia ba lika kasak kulkanka nani aiska sakras ba, baha dukiara baiki sakanka 35 ra numbi-ka 1 ra taki ba naha Lâka bapanka ra, kahbaia sip kabia paniska mayara kum, limitka kau tara ba lika naha lâka ra paniska kau sirpi mangkan ba kabia dîa sât saurka o mistikka daukan ba dukiara, bara limitka kau sirpi ba lika naha ra mangkan ba wina bakriki o baiki sakanka walhwal wina kumi kaia sip kabia.

Wihta waitna nani, Wihta mairin nani bara upla lâka dadaukra nani ba blestu daukaia kabia, lâka daukras paniska tânka wal, paniska kahbanka lâka bapanka nani dukiara tânka kaikaia o kupia ra di-maia.”

- c) Baiki Sakanka 153 ba sât wala daukuya, Lâ Numba 641 wina, “Saurka Tara Paniska baku Ulbanka Bapanka “, baha lika naku aisi kaikan kabia:

Baiki Sakanka 153. Latwan yabanka uba tara nani

Ani uplika mita wala ra munbia kaka, natka sâtka o daukanka kum bâk, wîna tara pîska kum lus tiwanka o yus âpu takanka, apia kaka wan sinska wina pîska nani kau tara wina kum, danh karnika âpu ba, sip kwihra tiwras ba, wîna tara pîska kum saura pali takan ba,

apia kaka wîna tara kat yabi sikniska o sinska kat yabi sikniska saura kum, purara paniska kahbia ba lika silak watla ra mani matsip wina matawalsip kat bâra kaia.

Latwan yabanka uba tara sinska ra yaban baku kulkisa, sinska ra siknsis kum yabia kaka bara daktar mita pain pali ai warkka daukbia sin uplika ba ai sinska kli sip pain briras an sip tiwras kaka, purara paniska kahbia ba lika silak watla ra mani matsip wina matawalsip kat bâra kaia.”

d) Baiki sakanka 155 ra Lâ Numba 641 wina ba sât wala daukuya, “Saurka Tara Paniska baku Ulbanka Bapanka”, baha lika naku aisi kaikan kabia:

Baiki Sakanka 155. Uvla bilara o pamali tila kat karnika ni saura munanka

Ani uplika bui karnika sâtka kum, karnika ni saura munanka o wîna ra o sinska ra sirang ikanka daukbia kaka, baha lika ani uplika ai maritka kan o wal piua bani brih iwi kan ba mapara saurka baku, sim baku ani uplika witin wal baha minitka ra bri o brih muni swin ba ra saura munanka baku, witinka nani ba lika nahmuna tânka ra: uplika wal latwan, tuktan waitna nani, tuktan mairin nani, wahma/tiara aihwa apia nani, upla aitani almuk nani, upla nani wîna skahwa ba, maritka pali luhpia mairin bara waitna nani ba, wal brih iwi o witin tâura kiamka nani, witin wina mayara kiamka nani, tâlia

bri mita ai taika nani ba, wal asla, ai mihta ra bri ba o pura kaikanka bri kaia sip ba mita. Tuktan waitna nani, tuktan mairin nani bara wahma/tiara aihwa apia nani tânka ra lika, pain taukaia dukiara wapnika mangkanka raitka briaia dukiara sip makabia apia.

Naha saurka daukbia uplika nani ra naha paniska nani ai purara kahban kabia:

- a) Latwan yabanka sirpi nani, paniska purara kahbia ba lika silak watla ra mani kum wina wâl kat bâra kaia;
- b) Latwan yabanka tara nani, paniska purara kahbia ba lika silak watla ra mani yumhpa wina 7 kat bâra kaia;
- c) Latwan yabanka uba tara nani, paniska purara kahbia ba lika silak watla ra mani matsip wina 12 kat bâra kaia.

Silak watla ra mangkaia paniska nani mangkan ba purkara, pamali tila kat karnika ni saura munanka daukan uplika nani ra, diara sip daukras tânka aihwa kum witin nani purara kahbia sim piua bilka ra, baha lika yapti wal, aisa an luhpa nani, apia kaka pura kaikanka natka ra kaia uplika kat raitka nani bal taki ba wina.”

- d) Baiki sakanka 162 ra Lâ Numba 641 wina ba sât wala daukuya, “Saurka Tara Paniska baku Ulbanka Bapanka”, baha lika naku aisi kaikan kabia:

Baiki Sakanka 162. Tuski munanka, saura munaia dukiara mapara buanka bara daukaia lukanka bapanka

Tuski munanka ba, saura munaia dukiara mapara buanka bara nahmuna saurka nani daukaia lukanka kahbanka ba: upla ikaia lâka, mairin ra ikaia, wan pamalika ra ikaia, upla wala ra ikaia, upla wîna pîska wal diara daukanka bara “célula” nani mâki ba saki upla wala ra dingkaia ba upla wîna ra sauhki bahuma dukiara “arma” nani paskaia, latwan yabanka sirpi nani, latwan yabanka tara nani bara latwan yabanka uba tara nani, baha sut ba sapta nani luan ra mangki banhwan ba, baha sut ba panis munan kabia ba sika limitka kau purara ba an baha lika naha Lâka ra paniska kau wiria kahban ba wina takbia, dîa sât saurka dukiara aisi ba dukiara bara ai limitka kau mayara ba lika baha wala mangkan ba wina bakriki kabia.”

- f) Baiki Sakanka 182 ra Lâ Numba 641 wina ba sât wala daukuya, “Saurka Tara Paniska baku Ulbanka Bapanka”, baha lika naku aisi kaikan kabia:

Baiki Sakanka 182. Upla nani pliska wina saki bisnis dauki ba

Upla nani pliska wina saki bisnis dauki saurka ba daukisa, ani uplika bui lalah aibapi, tâ brih ki, asla dauki, nikbanka dauki, tâ baikanka yabi, sinska ra dingkbia o natka sâtka wala wal upla nani pliki bribia, wahbi sâkbia, kantrak daukbia, impakanka natka, pliska wina sakaia ba, ai mihta ra brih ki main kaiki kaia ba, nahmuna saurka nani ra dingkaia dukiara: wîna brinka taibi munan dauki wina lalah saki ba, alba baku briaia, taiban natka ra o rait baku takuya maritka lâka, wîna brinka saurka natka ra dauki ba, alba baku wark dingki ba, taibi munan wark dauki ba, alba lâka o bahmuna sâtka nani praptiska dauki ba, utla bilara alba baku bri ba, upla wîna tara pîska nani saki muni upla ra atki ba, apia kaka lâ tânka âpu kum ra upla ra bri ba, baha natka ba kuntri bilara o sait ra daukan kabia dukiara, saura munan uplika mita ai kupia lâka wal âu win kabia sin, paniska kahbia ba lika silak watla ra mani 7 wina matawalsip kat kabia.

Paniska baku kahban kabia silak watla ra mani matawalsip bâra kabia, naku takbia taim:

1. Saurka dadaukra ba watawanka ba daukbia taim ai karnika ai mihta ra bri ba sanska ba wal o saura munan uplika ai swapnika bri ba sanska brih ki, saura munaia aisanka nani, sibrin dingki, ai paunka yus

muni o natka wala nani dauki taiban natka ra uplika ai kupia lâka apia kan yaban dauki ba bâk;

2. Saurka ba daukuya kaka nahmuna natka nani wal: uplika alki brih yukuki bri ba, kunin munanka, upla sut mawanra nina sauhkanka wal baha wina diara kum sakaia dukiara o saura munaia wi ba, prisant kum yabaia pramiska o diara manira wala o lalah yabaia pramiska o upla kum wina ai makabanka ra âu takbia dukiara;
3. Saurka daukan uplika ba tâ uplika kum, gabamint uplika o warkka takisa kaka.

Paniska baku kahban kabia silak watla ra mani 12 wina 14 bâra kabia naku takbia taim:

1. Saura munan uplika ba upla kum ai manka kau 18 ba alkra, apia kaka sip diara daukra uplika o saurka ba pamalika nani mita daukan sim tâlia bri lainka ra kiamka walwal kat o ai lama pali ra lika kiamka wâl ba kat bilara, skul lainka ra, pura kaikanka o spirit lainka ra tâ babaikra o pura kaiki ba, apia kaka saura munan uplika watla bilara pua bani wal bâra dimisa, apia kaka ai tila ba kat srinhka âpu tânka kum bâra sa kaka.
2. Saurka dadaukra ba tuktan mairin, tuktan waitna o tiara aihwa apia kum upla wina yabia, ai mihta ra

bribia, upla ra yabia, upla ra atkaia wibia, mihta ra mangkbia o laki yabia, bara baha dukiara lalah bâra o âpu kabia, mana aibapanka o prisantka bâra kabia, baha sut ba uplika ba wina hilpka sakaia dukiara, baha dukiara naha baiki sakanka ra ulban na.”

- g) Baiki Sakanka 183 ra Lâ Numba 641 wina ba sât wala daukuya, “Saurka Tara Paniska baku Ulbanka Bapanka”, baha lika naku aisi kaikan kabia:

Baiki Sakanka 183. Bapanka nani kau dauki ba

Karnika ni saura munanka wina tânka kau tara taki ba bahmuna, tuktan mairin kau tiara takras ra kunin muni saura munanka kau wirha daukan ba, taiban natka ra alki saura munan ba, wîna brinka taibi munan dauki wina lalah saki ba, baku sin tiara aihwa apia nani wîna brinka dauki ba lalah mana bara ulbanka o lilka tâskikira nani marikanka, kuntri bilara impaki laik taki bara kakaira taki nikbanka daukanka wîna brinka taibi munan dauki wina lalah saki ba, lâ wina sait ra wîna brinka dauki warkka buki saurka kum wina tânka kau tara taki ba, kakirhbra mairin nani taya wina raya iwi waitnika warkka ba o upla nani pliska wina saki bisnis dauki ba, ban kra aisika, yaptika o saura munan uplika ra lâ tânka kat main kaiki ba daukan uplika ba ra, baha purkara panis wala kum kahbia, baha sika diara sip daukras tânka aihwa pua mangkan ba bilara silak watla ra kaia paniska ba dukiara, baha ba yapti, aisa

bara luhpa nani aikuki tânka wina raitka nani bal taki ba, apia kaka ani uplika ra pura kaikanka bri ba wal.

Kupia tuskanka ba, saura munaia dukiara mapara buanka ba bara daukaia lukanka ba nahmuna saurka nani daukaia dukiara: wîna brinka taibi munan dauki wina lalah saki ba, tiara aihwa apia nani wal wîna brinka nani daukaia mana aibapi bara ulbanka o lilka tâskikira nani marikanka bâk, lâ wina sait ra wîna brinka dauki warkka buwanka, kakirhbra mairin nani taya wina raya iwi waitnika warkka o upla nani pliska wina saki bisnis dauki ba o wîna brinka taibi munan dauki wina lalah saki ba, baha sut ba saptika luan nani ra ulban ba, paniska sirpi kum witin nani purara kahban kabia, baha limitka kau tara ba lika Lâ ulbanka ra limitka kau mayara kahbi ba kabia ani saurka dukiara aisisa kaka, bara limitka kau sirpi ba lika wala kahbi ba wina tarbaik baman kabia.”

Baiki Sakanka 60. Tilara dingkanka

Naha Lâka ra Ulbanka Putka VIII ra pura prakanka nani bara sâtka wala dauki âu takan ba blestu dingkan kaia sa Lâ Numba 641 “Saurka Tara Paniska baku Ulbanka Bapanka” ba baiki sakanka nani kumi bani ulbanka ba tilara dingkan kaia sa, baha nani dukiara aisi ba kat.

ULBANKA PUTKA IX

KARNIKA ÂPU SWIN BAPANKA NANI, PIU PRAHNI DUKIA NANI BARA LÂS NANI

Sapta Kumi Baman

Karnika âpu swin bapanka nani, piu prahni dukia nani bara lâs nani

Baiki Sakanka 61. Karnika âpu swin nani

Naha bapanka nani na karnika âpu swin sa:

- a) Lâ Numba 228 ra baiki sakanka 21 bilara ulbanka pîska klaki muni wala tâ krikanka sekan ba, “Nica-ragua Puliska nani Lâka”, “La Gaceta” ra ulbi sakan ba, Gabamint Ulbanka Numba 162, Sikla Kati 28 yua mani 1996 ra; bara
- b) LÂ BAPANKA Numba 26-96 ra Baiki Sakanka 63 ba wina, Lâ Numba 228 ra Lâka Daukanka, Nica-ragua Puliska nani Lâka, “La Gaceta” ra ulbi sakan ba, Gabamint Ulbanka Numba 32, Kuswa Kati yua 13 mani 1997 ra.

Baiki Sakanka 62. Piu Prahni dukia nani

Naha Lâka mahka ai karnika briaia kainara mistik nani bara saura daukanka nani daukan kabia ba Lâ Numba

641 tânka kat lâka daukan kabia, baha sika “Saurka Tara Paniska baku Ulbanka Bapanka” baha pua ra ai karnika kau bri ba, Upla Lâka Dadaukra Apiska nani ai karnika bri ba ban mariki, baha bilara karnika nani bri bara ai warkka daukaia sip ba lâka nani aihwa ba kat.

Baiki Sakanka 63. Saurka Tara Paniska baku Ulbanka Bapanka ra Snaya ra Sinska Prahni prakan

Naha Lâka na Lâ Numba 641, “Saurka Tara Paniska baku Ulbanka Bapanka” tilara Snaya ra Sinska Prahni prakan Numbika 1 kabia. Snaya ra sinska prahni prakan na ulbi dingkan kaia sa Saurka Tara Paniska baku Ulbanka Bapanka dukiara ulbi sakanka nani daukbia bilara, wibia kaka ulbi sasakra pliska nani, print muni watla nani o bahmuna sinska nani lâ kat ulbi saki nani pliska nani, bahmuna karnika bri lalka bui baku adarka yabia kaka.

Art. 64. Diara kum âpu pliska ra ba tânka

Naha Lâka ra takbia lukras kan ba, Lâ Numba 641 bapanka nani bâk rul munan kabia, baha lika “Saurka Tara Paniska baku Ulbanka Bapanka” bara Lâ Numba 406 ba sin, “Saurka Tara Paniska Lâka daukanka Ulbanka bapanka Nicaragua Kuntrika Gabamintka bri ba”.

Baiki Sakanka 65. Karnika bri Piua

Naha Lâka na mahka ai karnika bribia “La Gaceta”, Gabamint Ulbanka ra yu nani 120 ningkara ulbi sâkbia ba wina.

Managua tawanka ra daukan sa, Nicaragua Kuntrika Gabamintka Lâ Dadaukra nani Aslika Mitin nani dauki ba Pliska ra, Siakwa Kati yua 26 mani 2012 ra. Ing. René Núñez Téllez, Nicaragua Lâka Dadaukra nani Aslika Prsidintka. Lic. Alba Palacios Benavidez, Lâ Dadaukra nani Aslika Âiulbrika Mairin.

Baku bamna. Nicaragua Gabamintka Lâka baku bri kabia. Yarka ulbi sakan kabia bara alki sin daukbia. Managua, Kuswa Kati yua 20, mani 2012. Daniel Ortega Saavedra, Nicaragua Kuntrika Gabamintka Prsidintka.

Miskitu bîla ra lakan:

Dr. h. c. Dionisio Francisco Melgara Brown

Waspam, Wangki Awala, Kakamuk Kati yua matsip,
mani 2013

